

摘藻堂四庫全書薈要

經部

欽定四庫全書薈要

經部  
左傳注疏卷七

詳校官原任侍講臣王燕緒



欽定四庫全書薈要卷一千一百二十三

經部

春秋左傳注疏卷七

起莊公元年盡十年

晉杜氏注

唐陸德明音義

孔穎達疏

莊公音義

陸曰莊公名同桓公之母正義曰魯世文姜諡法勝敵克亂曰莊疏家云莊公名

桓公之子文姜所生即桓六年子同生者也以莊四年即位諡法勝敵克壯曰莊是歲歲在鶉火

經元年春王正月疏

正義曰此月無事而空書月者莊雖不即君位而亦改元朝廟與民

更始史書其事見此月公宜即位而父弑母出不忍即位故空書其文閔僖亦然

三月夫人孫于齊注夫人莊公母也魯人責之故出奔

內諱奔謂之孫猶孫讓而去音義

孫本亦作遜音同注及傳同

疏

正注

義曰夫人孫意傳文不明故云魯人責之蓋責其訴公於齊侯而使公見殺故慙懼而出奔也公羊傳曰孫者何孫猶孫也內諱奔謂之孫穀梁傳曰孫之為言猶孫也諱奔也杜用彼為說昔帝堯孫位以讓虞舜故假彼美事而為之名猶孫讓而去釋例曰使若不為臣子所逐自孫位而去者

夏單伯送王姬注無傳單伯天子卿也單采地伯爵也

王將嫁女于齊既命魯為主故單伯送女不稱使也王

姬不稱字以王為尊且別於內女也天子嫁女於諸侯

使同姓諸侯主之不親昏尊卑不敵音義

單音善采七代反別彼列

反疏

注正義曰檢經上下公卿書爵大夫書字單伯書爵故為卿也單者天子畿內地名人君賜臣以邑

令采取賦稅謂之采地禮運曰諸侯有國以處其子孫大夫有采以處其子孫是謂食邑為采地單氏世仕王朝此及文公之世皆云單伯成公以下常稱單子知伯子皆爵也此時稱伯後降為子耳又解不稱王使之意王於時將遣魯主昏必先有命豈得未嘗命魯徑送女來故知王已命魯為主魯已承受王命單伯送女付魯而已不復重宣王命故不稱使也十一年王姬不云王使送者為送者微也以姬繫王不稱女字以王為尊故繫之於王且以別於內女內女則以字配姓謂之伯姬是也公羊傳曰使我主之曷為使我主之天子嫁女于諸侯必使諸侯同姓者主之諸侯嫁女于大夫必使大夫同姓者主之所以然者昏之行禮必賓主相敵天子於諸侯諸侯於大夫不親昏者尊卑不敵故也二王之後雖王所賓客示崇先代而已不得即與王敵嫁於二

王之後亦使諸侯主之秦漢以來使三公主之呼為公主

秋築王姬之館于外注公在諒闇慮齊侯當親迎不忍

便以禮接於廟又不敢逆王命故築舍於外音義梁又諒音

音亮迎

疏注正義曰穀梁傳曰築之外變之正也仇讐

魚敬反

之人非所以接昏姻也哀麻非所以接弁冕

也其意言公與齊為讐又身有重服不得與齊侯為禮

故築于外也左氏先儒亦用此為說杜案傳文稱請以

彭生除之齊人雖為殺彭生心實讐齊但不敢逆王命

故以諒闇為辭故築館于外杜謂諸侯之喪既葬則哀

麻除矣不得以喪服為言也若讐不除服未釋則諸侯

之國同姓多矣天王不應強使魯侯冒斬哀接父讐與

之行吉禮也以此益明杜諒闇之言為得其實徒以昏

姻吉禮行事在廟公在諒闇之內慮齊侯當來親迎不

可便以全吉之禮接賓於廟又讐除服釋不敢  
逆王命辭主昏故築舍於外使齊侯從外迎之

冬十月乙亥陳侯林卒注無傳未同盟而赴以名

王使榮叔來錫桓公命注無傳榮叔周大夫榮氏叔字

錫賜也追命桓公褒稱其德若昭七年王追命衛襄之

比音義

比必利反疏注正義曰公羊傳曰錫者何賜也命者

為其君請命於天子之使以無衣為辭則王錫諸侯當  
有服也傳稱王賜晉惠公命受玉情則王賜又有玉也  
但賜諸侯以玉者欲使執而朝覲所以合瑞今追命桓  
公若追命衛襄之比止應褒稱其德賜之策書或當有  
服以表尊卑不復合瑞未必有玉也釋例曰天子錫命  
其詳未聞諸侯或即位而見鉤或歷年乃加錫或已薨

而追錫魯桓薨後見錫則亦衛襄之比也魯成八年齊靈二十三年乃見錫  
隨恩所加得失存乎其事言存乎其事者觀其錫之早  
晚知恩之厚薄觀其人之善惡知事之得失故傳不復  
顯言其是非也杜於追命衛襄之下注云命如今之哀  
策魏晉以來唯天子崩乃有哀策將葬於是遣奠讀之  
陳大行功德敎臣子哀情非此類也人臣之喪不作哀  
策良臣既卒或贈之以官褒德敎哀載之於策將葬賜  
其家以告柩如今  
哀策蓋此謂也

王姬歸于齊注無傳不書逆公不與接疏

注正義曰成九年伯姬歸

于宋杜云宋不使卿逆非禮以逆者非卿故不書此云  
公不與接者杜意以公不與接雖卿亦不書也所以知  
者十一年齊侯來逆共姬而經不書故也又嫁伯姬于  
宋魯與宋無故此時有故知不與接也春秋之例送女



不書者取受我而厚之此單伯書者為送至於魯不至於齊故也

齊師遷紀邾鄆郚注無傳齊欲滅紀故徙其三邑之民

而取其地邾在東莞臨朐縣東南鄆在朱虛縣東南北

海都昌縣西有訾城音義

邾蒲丁反鄆子斯反訾子斯反

疏

注正義曰齊人遷此三邑非三邑之人自遷也故知齊欲滅紀故徙其三邑之民而取其地也蘇氏云直取其地不取其民故云遷不云取不言所往之處者志在去之而已非欲安存其人故與宋人遷宿文同其文異於邾遷也釋例曰邾遷于夷儀則以自遷為文宋人遷宿齊人遷陽則以宋齊為文各從彼此所遷之實記注之常辭亦非例也邾在東莞言鄆鄆在朱虛不言郡者釋例土地名朱虛亦屬東莞使之蒙上郡

傳元年春不稱即位文姜出故也注文姜與桓俱行

而桓為齊所殺故不敢還莊公父弑母出故不忍行

即位之禮據文姜未還故傳稱文姜出也姜於是感

公意而還不書不告廟音義

父弑音試一音如字疏注正義曰

為文姜出故也則即位之日文姜未還故知莊公以  
父弑母出不忍行其即位之禮也經書三月夫人孫  
于齊則是夫人來而復去故知文姜於是感公意而  
還也三月以來經傳皆無夫人還事故解之還不書  
不告廟釋例曰文姜之身終始七如齊再如莒皆以  
淫行書行而不書反則元年之還亦不告廟推此可  
知也公羊傳曰夫人固在齊矣其言孫于齊何念母  
也正月以存君念母以首事穀梁傳曰接練時錄母

之變始念之也其意言文姜往年如齊至此年三月猶尚不反三月練祭念及其母乃書其出奔非三月始從魯去也左氏先儒皆用此說杜不然者史之所書據實而錄未有虛書其事者也夫人若遂不還則孫已久矣何故至是三月始言孫于齊乎公若念及於母自可逕使來歸何以反書其孫豈莊公召命史官使書其母孫乎又禮三年之喪期月而練桓公以往年四月薨至今年三月未得一期何故已得為練而云接練錄變存君念母也若以經無還文即言留齊不反則自是以後亦無還文二年夫人會齊侯于禚豈復自齊會之哉以

○三月夫人孫于齊不稱姜

氏絕不為親禮也注姜氏齊姓於文姜之義宜與齊

絕而復奔齊故於其奔去姜氏以示義音義

復扶又反去起

呂疏

注正義曰文姜終始皆稱姜氏唯此一文獨異故傳解其意云不稱姜氏絕不為親言於夫人

之義宜與齊絕不復為親也姜氏者齊之姓也禮婦人在家則天父出嫁則天夫為夫斬衰三年為兄大功九月今兄殺己夫於文姜之義宜與齊絕姜意不與齊絕而復奔之故於其奔也特去姜氏去姜氏者若言夫人不是齊女不姓姜氏以示應絕之義應絕不絕所以刺文姜也傳言禮者為夫絕兄禮之意也公羊傳曰夫人何以不稱姜氏貶曷為貶與弑公也其與弑公奈何夫人譖公於齊侯公曰同非吾子齊侯之子也齊侯怒使公子彭生擯幹而殺之穀梁傳亦云不言氏姓貶之也左氏先儒取二傳為說言傳稱絕不為親禮也謂莊公絕母不復以之為親為父絕母得禮尊父之義故曰禮也杜不然者釋例曰文姜與公如齊以淫見譴懼而歸訴於襄公襄公殺公而委罪於彭生弑公之謀姜所不與疑懼而自留於

齊莊公感其不反以闕即位之禮故姜氏自齊而還魯魯人探情以責之故復出奔夫子以為姜氏罪不與弑於莊公之義當以母淫於齊而絕其齊親內全母子之道故經不稱姜氏傳曰絕不為親禮也明絕之於齊也文姜稱夫人明母義存也哀姜外淫故孫稱姜氏明義異也觀此解之意夫人宜與齊絕釋例之文言莊公宜與齊絕者夫人猶尚宜絕莊公固宜絕矣先儒謂莊公宜與母絕杜意莊公宜與齊絕故偏據莊公為文所以非舊說耳

○秋築王姬之館于

其實夫人及公俱當與齊絕也

外為外禮也注齊彊魯弱又委罪於彭生魯不能讐

齊然喪制未闕故異其禮得禮之變音義

未闕苦疏

注正義曰傳不直言禮而云為外禮者築之是常未足褒美正為築之于外是應變之禮故解其意齊彊

魯弱又委罪彭生魯既不能讐齊齊雖內實深讐外若無怨既不敢辭王命又不欲見齊侯因其喪制未闕故異其禮為之於外是其得禮之變也樂息為闕則闕訓為息也未闕言其未止息也王姬之館必築之者公羊傳曰主王姬者必為之改築於路寢則不可小寢則嫌羣公子之舍則以卑矣其道必為之改築者也穀梁傳曰於廟則已尊於寢則已卑為之築節矣鄭箴膏肓云宮廟朝廷各有定處無所館天子之女故宜築于宮外是言須築之意也但杜意若其內不恨齊非有喪制不須築於城之外耳此言外者謂城之外說公羊穀梁者亦以為城外然王姬來嫁必須築館所以十一年王姬不築館者或因其舊館或築而不書也

經二年春王二月葬陳莊公注無傳魯往會之故書例

在昭六年

夏公子慶父帥師伐於餘丘注無傳於餘丘國名也莊

公時年十五則慶父莊公庶兄

疏注正義曰公羊穀梁皆以於餘丘為邾之

別邑左氏無傳正以春秋之旨未有伐人之邑而不繫國者此無所繫故知是國釋例注闕不知其處蓋近魯

小國也莊公時年十五者以桓六年生至此二年為十

五莊二十七年公羊傳曰公子慶父公子牙公子友皆

莊公之母弟也左氏先儒用此為說杜以不然故明之

釋例曰經書公子慶父伐於餘丘而公羊以為莊公母

弟計其年歲既未能統軍又無晉悼王孫滿幼知之文

此蓋公羊之妄而先儒曾不覺悟取以為左氏義今推

案傳之上下羽父之弑隱公皆諮謀於桓公則桓公已

成人也傳曰生桓公而惠公薨指明仲子唯有此男非

謂生在薨年也桓以成人而弑隱即位乃娶於齊自應有長庶故氏曰孟此明證也公疾問後於叔牙牙稱慶父材疑同母也傳稱季友文姜之愛子與公同生故以死奉般情義相推考之左氏有若符契是杜明其異母之意也氏曰孟氏傳文實然而經稱仲孫杜無明釋八年傳稱仲慶父其舉諡稱之則謂之共仲蓋慶父雖為庶長而以仲為字其後子孫以字為氏是以經書仲孫時人以其庶長稱孟故傳稱孟孫其以諡配字而謂之共仲猶臧僖伯管敬仲之類也劉炫云蓋慶父自稱仲欲同於正適言己少次莊公為三家之長故以莊公為伯而自稱仲春秋之例皆傳言實而經順其意經稱當時之事書其自稱之辭其人自稱仲孫不得不書為仲傳序已適之事舉其時人之語時人呼為孟氏不得不以孟錄論語云孟孫問孝於我是時人呼云孟氏也楚公子棄疾弑君取國改名為居經書楚子居卒是從其自稱也



秋七月齊王姬卒注無傳魯為之主比之內女疏

注正義曰

他國夫人之卒例皆不書唯魯女為諸侯之妻書其卒耳王姬非是內女亦書其卒為比之內女故也檀弓曰齊告王姬之喪魯莊公為之大功或曰由魯嫁故為之服姊妹之服是其比內女也

冬十有二月夫人姜氏會齊侯于禚注夫人行不以禮

故還皆不書不告廟也禚齊地音義

禚諸若反

乙酉宋公馮卒注無傳再與桓同盟音義

馮皮冰反疏注正義曰

桓十一年盟于折十二年于穀丘是再也

傳二年冬夫人姜氏會齊侯于禚書姦也注文姜前

與公俱如齊後懼而出奔至此始與齊好會會非夫  
人之事顯然書之傳曰書姦姦在夫人文姜比年出  
會其義皆同音義好呼報反

經三年春王正月溺會齊師伐衛注溺魯大夫疾其專

命而行故去氏音義

溺乃狄反疏注正義曰隱四年翬  
去起呂反會宋公陳侯蔡人衛

人伐鄭傳曰羽父請以師會之公弗許固請而行故書  
曰翬帥師疾之也彼不稱公子傳言疾之今溺亦不稱  
公子傳亦言疾之知其事與翬同疾其專命而  
行故去氏也公子非氏貶與氏同故言氏也

夏四月葬宋莊公注無傳

# 五月葬桓王

秋紀季以鄫入于齊注季紀侯弟鄫紀邑在齊國東安

平縣齊欲滅紀故季以邑入齊為附庸先祀不廢社稷

有奉故書字貴之音義

鄫戶圭反本又作攜疏注正義曰公羊傳

之弟也何以不名賢也何賢乎紀季請後五廟以存姑姊妹穀梁傳曰鄫紀之邑也入于齊者以鄫事齊也杜

取彼為說知季是紀侯之弟以鄫邑入齊為附庸之君附屬齊國也諸侯之卿例當書名善其能自存立故書

字貴之也釋例曰齊侯鄭伯詐朝于紀欲以襲之紀人大懼而謀難於魯請王命以求成於齊公告不能齊遂

偪之遷其三邑國有旦夕之危而不能自入為附庸故分季以鄫使請事於齊大去之後季為附庸先祀不廢

社稷有奉季之力也故書字不書名書入不書叛也判分也傳曰始分為紀侯大去張本也劉賈謂紀季以鄫奔齊不言叛不能專鄫也傳稱紀侯不能下齊以與紀季季非叛也紀亡之後叔姬歸于鄫明為附庸猶得專鄫故可歸也是杜其說貴之意也以叔姬歸鄫知鄫為附庸附庸之君雖無爵命而分地建國南面之主得立宗廟守祭祀僖二十一年傳曰任宿須句顓臾皆風姓也寔司大皞與有濟之祀論語云夫顓臾昔者先王以為東蒙主須句顓臾皆附庸也得祀所出之祖主其竟內山川明得祀先君奉社稷

冬公次于滑注滑鄭地在陳留襄邑縣西北傳例曰凡師過信為次兵未有所加所次則書之既書兵所加則

不書其所次以事為宜非虛次音義

滑乎八反疏注正又于八反疏義曰

此解畧而釋例詳釋例曰凡師一宿為舍再宿為信過  
信為次此周公之典以詳錄師出入行止遲速因為之  
名也兵事尚速老師費財不可以久故春秋告命三日  
以上必記其次舍之與信不書者輕碎不以告也兵未  
有所加所次則書之以示遲速公次于滑師次于郎是  
也既書兵所加則不書其所次以事為宜非虛次諸久  
兵而不書次是也既書兵所加而又書次者義有取於  
次遂伐楚次於涇盟於牡丘遂次於匡是也所記或次  
在事前次以成事也或次在事後事成而次也皆隨事  
實無義例也杜言既書兵所加則不書其次者或伐或  
戰曠日持久其間必有三日之次既書戰伐則不書次  
雖次在事前次在事後皆不書也既書兵所加而又書  
次者義有取於次齊侯伐楚楚彊齊欲綏之以德故不  
速進而次於涇盟於牡丘本為救徐名使大夫救徐次  
匡以為之援義取於次故書兵所加而又書其次次在  
事前謂僖元年齊師宋師曹師次于聶北救邢也次在

事後謂襄二十三年叔孫豹帥師救晉次于雍榆也。聶北之下公羊傳曰：曷為先言次而後言救君也？雍榆之下公羊傳曰：曷為先言救而後言次？先通君命也。左氏先儒取彼為說，言齊桓君也。進止自由，故先次後救。叔孫臣也，先通君命，故先救後次。杜以傳無此言，故改正其謬，言此二事或次以成事，或事成而次，皆隨事實。先後而書之，無義例也。先儒又言書次者皆善之辭，釋例曰：叔孫救晉次于雍榆，傳曰：禮者善其宗助盟主，非以次為禮也。齊桓次于聶北，救邢亦以存邢具其器用，師人無私見，善不在次也。而賈氏皆即以為善次次之，與否自是臨時用兵之宜，非禮之所素制也。言非素制者，非禮家制此名以為善號也。沈氏云：將會鄭伯，非軍旅而書次者，古者君行師從卿，行旅從故亦從師行之例也。

傳三年春溺會齊師伐衛疾之也。注傳重明上例音。

義重直用反

○夏五月葬桓王緩也注以桓十五年三月

崩七年乃葬故曰緩○秋紀季以鄆入于齊紀於是

乎始判注判分也言分為附庸始於此○冬公次于

滑將會鄭伯謀紀故也鄭伯辭以難注厲公在櫟故

音義難乃旦反櫟音歷或音書約反

凡師一宿為舍再宿為信過信

為次注為經書次例也舍宿不書輕也言凡師通君

臣疏

注正義曰舍者君行一日止而舍息也信者住經再宿得相信問也穀梁傳曰次止也則次亦

止舍之名過信以上雖多日亦為次不復別立名也通君臣者公次于滑君也叔孫豹次于雍榆臣也但

是師行皆從此例君將不言帥師故止云公次亦師次也非師之次則不在此例釋例譏賈氏云若魯公次乾侯之比非為用師不應在例而復例之亦為濫也

經四年春王二月夫人姜氏享齊侯于祝丘注無傳享

食也兩君相見之禮非夫人所用直書以見其失祝丘

魯地音義

食音嗣又如字本或疏注正義曰鄭玄儀禮作會以見賢遍反注云饗謂享大牢以

飲賓則享是飲酒大禮與會小別而以享為會者言夫人與齊侯會而設享禮故書享齊侯也定十年夾谷之會傳稱齊侯將享公孔丘拒之乃不果享是享者兩君相見之禮二年穀梁傳曰婦人不言會言會非正也饗甚矣是享非夫人所當用也禮不合用而夫人用之故直書以見其失也定本享會作享食也



三月紀伯姬卒注無傳隱二年裂繻所逆者內女唯諸

侯夫人卒葬皆書恩成於敵體疏

注正義曰穀梁傳曰外夫人不卒此其言

卒何也吾女也適諸侯則尊同以吾為之變卒之也為之變者為之服也禮諸侯絕期尊同則為之變服服大功九月恩成於敵體故書其卒適大夫則畧之釋例曰內女唯諸侯夫人卒乃書恩成於敵體其非適諸侯則畧之以服制相準也生書其來而死不錄其卒從外大夫之比也

夏齊侯陳侯鄭伯遇于垂注無傳

紀侯大去其國注以國與季季奉社稷故不言滅不見

迫逐故不言奔大去者不反之辭疏

注正義曰傳稱紀侯不能下齊以與

紀季是往年分鄫與之紀國猶在今則全以紀與之故云以國與季釋例曰紀侯力弱慮窮自以列國不忍屈臣於齊使季以鄫求安而脫身外寓季果為附庸社稷有奉故不言滅不見迫逐故不言奔大去者不反之辭蓋時史即實而言仲尼弗改故傳不言故書書曰也是說大去之意也滅人國者皆毀其宗廟遷其社稷紀季雖降為附庸得自立廟社而其國不滅也諸侯之奔皆被逐而出此則不見迫逐故不言奔時史謂之大去仲尼以為得理故因而用之十二年叔姬歸于鄫則紀季雖全得紀國亦不移就紀都紀之宗廟社稷皆遷之於鄫承祀如本故為不滅雖云國祚不滅其實為齊所吞紀之器物財賄亦應為齊得成二年傳稱紀甌玉磬目之以紀得非滅紀所得也季既入臣於齊縱使齊不取必應以之為賂假令季以賂齊亦是滅紀所得也

六月己丑齊侯葬紀伯姬注無傳紀季入鄫為齊附庸

而紀侯大去其國齊侯加禮初附以崇厚義故攝伯姬之喪而以紀國夫人禮葬之疏注正義曰紀侯由齊大其夫人故解其意云云雖為齊侯所葬亦由魯往會之故書釋例曰紀侯大去其國令弟納邑附齊齊侯嘉而愍之恩及伯姬姬魯女故以來告大夫會葬故書齊侯葬紀伯姬也不書諡者亡國之婦夫妻皆降莫與之諡而賈許方以諸侯禮說又失之也

## 秋七月

冬公及齊人狩于禚注無傳公越竟與齊微者俱狩失

禮可知音義

狩手又反竟音境本又作境

傳四年春王三月楚武王荆尸授師子焉以伐隨注

尸陳也荆亦楚也更為楚陳兵之法揚雄方言子者

戟也然則楚始於此參用戟為陳音義

子吉熱反方言云楚謂戟

為子為陳

疏

注正義曰尸陳也釋詁文荆即楚之舊邑故云荆亦楚也楚本小國地狹民少

直觀反

雖時復出師未自為灋武今始言荆尸則武王初為此楚國陳兵之法名曰荆尸使後人用之宣十二年傳稱荆尸而舉是遵行之也揚雄以爾雅釋古今之語作書擬之采異方之語謂之方言方言云戟謂之子郭璞云取名於鉤子也戟是擊刺之兵有上刺之力又有下鉤之刃故以鉤子為名也始云授師子焉是往前未以此器授師故云然則楚始於此參用戟為陳言參用之者參雜用之陳之所用非專用戟

將齊入告夫人鄧曼曰余心蕩注將授兵於廟故齊

蕩動散也音義

齊側皆反注同

鄧曼歎曰王祿盡矣盈而蕩

天之道也先君其知之矣故臨武事將發大命而蕩

王心焉注楚為小國僻陋在夷至此武王始起其衆

僭號稱王陳兵授師志意盈滿臨齊而散故鄧曼以

天地鬼神為徵應之符音義

僻匹亦反僭子念反應應對之應

若師

徒無虧王薨於行國之福也注王薨於行不死於敵

王遂行卒於櫛木之下注櫛木木名音義

櫛郎蕩反又莫昆反

又武疏

注正義曰此字之音或為曼或為朗若以蒲元反疏為聲當作曼以兩為聲當作朗字體難定故

兩為之音杜直云木名不知木何所似木有似榆者俗呼為朗榆蓋為朗也

令尹鬬祁莫

敖屈重除道梁澁營軍臨隨隨人懼行成注時秘王

喪故為奇兵更開直道澁水在義陽厥縣西東南入

鄖水梁橋也隨人不意其至故懼而行成音義

重直用反

一音直容反澁高貴鄉公音側嫁反

疏注正義曰除道謂除治新

水名字林壯加反鄖音云或作員

路故知更開直道梁澁為作梁於澁故為橋也釋例

曰義陽厥縣西有澁水源出縣北從縣西東南至隨

縣入鄖水杜以澁解澁

蓋聲相近而字轉耳莫敖以王命入盟隨侯且請

為會於漢汭而還注汭內也謂漢西音義

汭如銳反水曲曰汭

濟漢而後發喪疏

正義曰莫敖既與隨侯盟且又請

後還楚也隨侯畏楚遂從莫敖為會禮會訖隨侯因濟漢還國而後發王喪也

○紀侯不能

下齊以與紀季注不能降屈事齊盡以國與季明季

不叛音義

下遐嫁反

夏紀侯大去其國違齊難也注違辟

也音義

難乃旦反

經五年春王正月

夏夫人姜氏如齊師注無傳書姦疏

正義曰於時齊無征伐之事不知師

在何處蓋齊侯疆理紀地有師在紀杜云書姦姦發夫  
人當向紀地從之不言會者往其軍內就齊侯耳不行  
禮會

秋郕犁來來朝注附庸國也東海昌慮縣東北有郕城

犁來名音義

郕五兮反國名後為小邾犁  
力兮反慮如字又力於反

冬公會齊人宋人陳人蔡人伐衛

傳五年秋郕犁來來朝名未王命也注未受爵命為

諸侯傳發附庸稱名例也其後數從齊桓以尊周室

王命以為小邾子音義

數音朔疏注正義曰郕者附庸  
之國犁來其君之名



傳言未王命者解其稱名之意由未得爵命為諸侯  
故稱名也經書其名傳言未王命此傳所發即是附  
庸稱名之例例當稱名故儀父稱字為貴之也邠之  
上世出於邾國世本云邾顏居邾肥徙邠宋仲子注  
云邾顏別封小子肥於邠為小邾子則顏是邾君肥  
始封邠譜云小邾邾俠之後也夷父顏有功於周其  
子友別封為附庸居邠曾孫犂來始見春秋附從齊  
桓以尊周室命為小邾子穆公之孫惠公以下春秋  
後六世而楚滅之世本言肥杜譜言友當是一人  
僖七年經書小邾子來朝知齊桓請王命命之 ○

冬伐衛納惠公也注惠公朔也桓十六年出奔齊

經六年春王正月王人子突救衛注王人王之微官也

雖官卑而見授以大事故稱人而又稱字疏

注正義曰昭十二年

傳稱叔孫昭子三命踰父兄則昭子之父叔孫豹再命也再命而名見於經知諸侯之卿再命三命皆書名一命乃稱人諸侯之臣既然則王朝之臣亦然周禮王之上士三命中士再命下士一命故杜以為劉夏石尚稱名氏者上士中士也稱王人者下士也僖八年公羊傳曰王人微者知此王人亦微者故云王人王之微官也春秋之世二字而子在上者皆是字故知子突是字救衛必以師救而文不稱師於例為將卑師少以卑官而帥少師救衛不能使衛侯不入是無功也無功而稱字者以朔既讒構取國而又不能於民王意即定黔牟不欲使朔得入故遣師救之時史惡諸侯逆王命故尊王使言子突雖則官卑蒙王授以大事故稱人而又稱字貴王人所以責諸侯也釋例曰莊六年五國諸侯犯逆王命以納衛朔大其事故字王人謂之子突是說進之意也進之不稱名而越稱字者王之上士下士爵同而命異耳進之同中士未足以為榮故超從大夫之例稱

字以貴之也文二年垂隴之會晉士穀堪其事即書名氏似若真為卿然故不復稱人此貴子突止為敦責諸侯非是人實堪進故稱人依其本班稱字見其別有所為耳穀梁傳曰王人卑者也名貴之也善救衛也救者善則伐者不正矣杜意取彼為說唯以子突為字耳范甯注穀梁亦云此名當為字誤爾

夏六月衛侯朔入于衛注朔為諸侯所納不稱歸而以

國逆為文朔懼失衆心以國逆告也歸入例在成十八

年疏

注正義曰去年齊宋陳蔡伐衛傳曰納惠公也此年衛侯得入則是諸侯納之當言歸而經書入成

十五年宋華元奔晉宋人迎而反之當言復歸而經書歸釋例曰朔懼有違衆之犯而以國逆告華元實國逆欲挾晉以自助故以外納赴春秋從而書之示二子之情也凡諸侯外納有三一者以言語告請得入蔡季歸

于蔡是也二者興師送入其國楚人圍陳納頓于於頓是也三者所納之君別在他國而諸侯師伐彼國令其得入今公及諸侯伐衛是也

秋公至自伐衛注無傳告于廟也

螟注無傳為災音義

螟亡  
丁反

冬齊人來歸衛俘注公羊穀梁經傳皆言衛寶此傳亦

言寶唯此經言俘疑經誤俘囚也音義

俘芳疏  
夫反  
注正義  
曰釋例

曰齊人來歸衛寶公羊穀梁經傳及左氏傳皆同唯左氏經獨言衛俘考三家經傳有六而其五皆言寶此必左氏經之獨誤也案說文保從人臬省聲古文保不省然則古字通用寶或保字與俘相似故誤作俘耳杜既

以為誤而又解俘為囚是其不敢正決故且從之

傳六年春王人救衛○夏衛侯入放公子黔牟于周

放甯跪于秦殺左公子洩右公子職注甯跪衛大夫

甯之以遠曰放音義

甯乃定反跪其毀反甯音又

乃即位君子以

二公子之立黔牟為不度矣夫能固位者必度於本末而後立衷焉不知其本不謀知本之不枝弗強注

本末終始也衷節適也譬之樹木本弱者其枝必披

非人力所能強成音義

度待洛反下同衷丁仲反注同王音忠強其丈反注同披

普靡反又

詩云本枝百世注詩大雅言文王本枝俱

茂蕃滋百世也音義

煩蕃音疏

正義曰君子以二公子

度形勢矣夫立人為君使能自堅固其位者必當揆  
度於本末度其本者謂其人才德賢善根本牢固度  
其末者謂其人終能保有邦國蕃育子孫知其堪能  
自固而後立其衷焉衷謂節適言使得節適時乃立  
之也若不能知其本之可立與否則不當謀之如似  
樹木知其根本之弱不能生長枝葉以喻所立之人  
材力劣弱不能保有邦國蕃育子孫則不須自強立  
之詩以樹木本幹喻適枝葉喻庶言文王子孫本幹  
枝葉適子庶子皆傳國百世由文王之德堪使蕃滋  
故也劉炫云度其本謂思所立之人有母氏之寵有  
先君之愛有彊臣之援為國人所信服也度其末謂  
思所立之人有度量有知謀有治術為下民所愛樂

也○冬齊人來歸衛寶文姜請之也注公親與齊共

伐衛事畢而還文姜淫於齊侯故求其所獲珍寶使

以歸魯欲說魯以謝慙音義

說音悅

○楚文王伐申過

鄧鄧祁侯曰吾甥也注祁諡也姊妹之子曰甥音義

祁巨支反字林上尸反

疏

注正義曰諡法經典不易曰祁衛有石祁子亦諡也釋親云謂我舅者吾

謂之甥是姊妹之子曰甥

止而享之驢甥甥養甥請殺楚子注

皆鄧甥仕於舅氏也音義

驢音佳

鄧侯弗許三甥曰亡

鄧國者必此人也若不早圖後君噬齊注若齧腹齊

喻不可及音義

噬市制反齊粗兮反齧五結反

其及圖之乎圖之此

為時矣鄧侯曰人將不食吾餘注言自害其甥必為

人所賤疏

正義曰食謂噉之為甥設享而因享害之所有餘食更為人設之將賤吾不肯復食

噉吾之餘食也膏肓以為楚鄧彊弱相縣若從三甥之言楚子雖死鄧滅曾不旋踵若剗腹去疾炊炭止沸左氏為短鄭箴云楚之彊盛從滅鄧以後於時楚未為彊何得云彊弱相縣蘓氏云三甥既有此語左氏因史記之文錄其實事

對曰若不從三臣抑社稷

非君子之論何以非之

實不血食而君焉取餘注言君無復餘音義

馬於虔反復扶

又反下文同

弗從還年楚子伐鄧注伐申還之年十六年



楚復伐鄧滅之注魯莊公十六年楚終強盛為經書

楚事張本疏

注正義曰知非楚文王十六年者以文王莊五年即位至十九年卒唯十五年

耳

經七年春夫人姜氏會齊侯于防注防魯地

夏四月辛卯夜恒星不見注恒常也謂常見之星辛卯

四月五日月光尚微蓋時無雲日光不以昏沒音義

不見

賢遍反注疏

注正義曰恒常釋詁文夜者自昏至旦之總名但此經下言夜中則此言夜者夜未

至中謂初昏之後耳非竟夜不見星也穀梁夜作昔傳曰日入至於星出謂之昔不見者可以見也必如彼言

星出以前名之曰昔則名昔之時法當未有星矣何以怪其不見而書為異也明經所言夜者夜昏之後星應見之時而不見耳公羊傳曰恒星者何列星也言天官列宿常見之星也於時周之四月則夏之仲春月令仲春之月日在奎昏弧中鄭玄云弧在輿鬼南則於時南方之星盡當列見謂常見之星者謂南方星也杜以長歷校之知辛卯是四月五日也杜以五日月光尚微不能掩星使不見若有雲蔽當時復無雲蓋日光不以昏沒是故以夜中星隕如雨注如而也夜半乃有雲星落為異也

而且雨其數多皆記異也日光不匿恒星不見而云夜

中者以水漏知之音義

夜中夜半也丁仲反又如字疏隕于閔反落也匿女力反

注正義曰公羊說如雨者言其狀似雨也此傳言星隕如雨與雨偕也偕訓為俱與雨俱下不得為狀似雨也

故轉如為而謂星落而且雨其數多與雨雜下所落非一星也非常為異害物為灾此二事雖是天之變異不見物被灾害皆記異也星隕非常固可記異雨乃常事亦言之者見星之隕其勢宜明時乃陰雨雨內見星所以為異主言星之異不言雨之為異也夜之早晚以星為驗日光不匿恒星不見而云夜中者以水漏知之漏者晝夜百刻於時春分之月夜當五十刻二十五刻而夜半也

## 秋大水注無傳

無麥苗注今五月周之秋平地出水漂殺熟麥及五稼

之苗音義

漂匹妙反疏注正義曰直言無麥苗似是麥又匹遙反

曷為先言無麥而後言無苗待無麥然後書無苗如彼傳文知麥苗別也且此秋今之五月麥已熟矣不得方

云麥之無苗故知熟麥及五稼之苗皆為水漂殺也種之曰稼斂之曰穡月令五時食穀黍稷麻麥豆周禮謂之五穀故云五稼之苗何休云禾初生曰苗秀曰禾

冬夫人姜氏會齊侯于穀注無傳穀齊地今濟北穀城縣

傳七年春文姜會齊侯于防齊志也注文姜數與齊侯會至齊地則姦發夫人至魯地則齊侯之志故傳

畧舉二端以言之音義

數音朔

疏

注正義曰文姜數與齊侯會者二年于禚

四年于祝丘五年如齊師此年于防于穀是也哀十五年傳稱齊致禚媚杏於衛則禚是齊地定五年傳

稱季平子行東野卒于防則防是魯地傳於齊地言  
書姦於魯地言齊志故知至齊地則姦發夫人至魯  
地則齊侯之志也二年會之始此年會之末故傳畧  
舉二端以言之明其餘意同也杜于禚于穀皆言齊  
地于祝丘言魯地見其有二意若其不然桓五年經  
書城祝丘祝丘魯地不須解之釋例曰婦人無外事  
見兄弟不踰闕故其他行非禮所及亦例所不存而  
當其時實有出入或以事宜或以淫縱小君之行不  
得不書故直書其行而其善惡各繫於本會于禚傳  
稱書姦夫人入齊地也會于防傳稱齊志齊侯入魯  
地也於經無例  
傳以實言之

○夏恒星不見夜明也星隕如雨與

雨偕也注偕俱也音義

皆音

○秋無麥苗不害嘉穀

也注黍稷尚可更種故曰不害嘉穀

經八年春王正月師次于郎以俟陳人蔡人注無傳期

共伐邾陳蔡不至故駐師于郎以待之疏

注正義曰唯言以俟陳蔡

不知何故待之下有師及齊師圍邾或與陳蔡同計故云期共伐邾陳蔡不至故待之賈逵及說穀梁者皆云陳蔡欲伐魯故待之陳蔡於魯竟絕路遙春秋以來未嘗構怨何因輒伐魯也又俟者相須同行之辭非防寇拒敵之稱若是畏其來伐當謂之禦不得稱俟故知期共伐邾耳何休服虔亦言欲共伐邾

甲午治兵注治兵於廟習號令將以圍邾疏

注正義曰周禮中春

教振旅中秋教治兵穀梁傳曰出曰治兵習戰也入曰振旅習戰也公羊傳曰出曰祠兵入曰振旅其禮一也皆習戰也釋天云出為治兵尚威武也入為振旅反尊卑也孫炎云出則幼賤在前貴勇力也入則尊老在前

復常灋也彼言治兵振旅皆謂因田獵而選車徒教戰  
灋習號令知此治兵亦是習號令此治兵於廟欲就尊  
嚴之處使之畏威用命耳但軍旅之衆非廟內所容止  
應告於宗廟出在門巷習之昭十八年傳稱鄭人簡兵  
大蒐將為蒐除杜云治兵於廟城內地迫故除廣之是  
告於廟習於巷也下有圍郕知治兵為圍郕也沈云周  
禮中秋治兵月令孟春令云是月也不可以稱兵所以  
甲午治兵者以為圍郕故非時治兵猶如備難而城雖  
非時不譏沈又云治兵之禮必須告廟告廟雖是內事  
治兵乃是外事故雖告廟仍用甲午且治兵則征伐之  
類又為圍郕雖在郊內亦用剛日甲午  
治兵公羊以為祠兵謂殺牲饗士卒

夏師及齊師圍郕郕降于齊師注二國同討而齊獨納

郕音義

降戶江反  
傳皆同

疏

正義曰於例將卑師衆稱師此直  
言師則公不自將傳稱仲慶父請

伐齊師聞邾降齊師在  
國請耳非是軍中請也

秋師還注時史善公克已復禮全軍而還故特書師還

疏注正義曰春秋之例公行征伐還則書至命將出師  
未有書師還者也慶父請伐齊師欲以自圍邾之師

迴伐齊師若用其言則方相戰鬪師或喪敗公乃自責  
無德引罪歸己時史善公克已復禮全軍而還喜其得  
還故特書師還也傳言君子是以善魯莊公也仲尼以為得理故因  
時之史書此師還以善魯莊公也仲尼以為得理故因  
而用之克已復禮論語文也克勝也已雖恨齊勝情而  
止責己而不責於人合於禮意僖三十年秦晉圍鄭傳  
稱秦人竊與鄭盟子犯請擊秦師晉侯不許與此事同  
而彼無善文者魯莊中平之主能有善事故為可嘉晉  
文身為霸主而私自恨鄭引秦共伐而秦人背之失其  
所與則為不知得免不知之譏已為幸矣雖不從子犯



未足可尚時史不善其  
事故仲尼亦無褒文

冬十有一月癸未齊無知弑其君諸兒注稱臣臣之罪

也音義

兒如字一  
音五兮反

傳八年春治兵于廟禮也夏師及齊師圍邾邾降于

齊師仲慶父請伐齊師注齊不與魯共其功故欲伐

之公曰不可我實不德齊師何罪罪我之由夏書曰

臯陶邁種德注夏書逸書也稱臯陶能勉種德邁勉

也音義

夏戶雅反後  
故此陶音遙

德乃降疏

正義曰此虞書臯陶  
謨之文以述禹事故

傳謂之夏書孔安國以為邁行種布降下也言皋陶能行布其德德乃下洽於民故民歸之今引之斷章取證降義當言皋陶能布行其德由其有德乃為人降服也杜不見古文故以為逸書以邁為勉言皋陶能勉力種樹功德不知德乃降亦是書文謂為莊公之語故隔從下注言能慕皋陶之種德乃人自降服之自恨不能如皋陶也

姑務修德以待時乎注言苟有德乃為人所降服姑且也秋師還君子是以善魯莊公注傳

言經所以即用舊史之文○齊侯使連稱管至父戍

葵丘注連稱管至父皆齊大夫戍守也葵丘齊地臨

淄縣西有地名葵丘音義

稱尺證反又如字

瓜時而往曰及

瓜而代期戍公問不至注問命也音義

期音基本亦作暮

請

代弗許故謀作亂僖公之母弟曰夷仲年生公孫無

知有寵於僖公衣服禮秩如適注適太子音義

適丁歷反

注襄公絀之二人因之以作亂注二人連稱管至父

音義

絀勅律反

連稱有從妹在公宮無寵使間公注伺公

之間隙音義

從才用反下從者皆同間如字注同或古覓反非

曰捷吾以女

為夫人注捷克也宣無知之言音義

捷在接反女音汝

冬十

二月齊侯游于姑棼遂田于貝丘注姑棼貝丘皆齊

地田獵也樂安博昌縣南有地名貝丘音義

禁扶云反貝補

蓋反樂

音洛見大豕從者曰公子彭生也注公見大豕而

從者見彭生皆妖鬼公怒曰彭生敢見射之豕人立而啼公懼隊于車傷足喪屨反誅屨於徒人費注誅

責也音義

敢見賢遍反射食亦反啼田兮反隊直類反喪息浪反屨九具反費音秘

弗得

鞭之見血走出遇賊于門刼而束之費曰我奚御哉

袒而示之背信之費請先入注詐欲助賊音義

御魚呂反

袒音但

伏公而出鬪死于門中石之紛如死于階下注

石之紛如齊小臣亦鬪死音義

紛敷文反

遂入殺孟陽于

牀注孟陽亦小臣代公居牀音義

牀士良反

曰非君也不

類見公之足于户下遂弑之而立無知注經書十一

月癸未長厯推之月六日也傳云十二月傳誤初襄

公立無常注政令無常鮑叔牙曰君使民慢亂將作

矣奉公子小白出奔莒注鮑叔牙小白傳小白僖公

庶子音義

鮑步卯反

亂作管夷吾召忽奉公子糾來奔注

管夷吾召忽皆子糾傅也子糾小白庶兄來不書皆

非卿也為九年公伐齊納子糾齊小白入于齊傳音

義

召詩照反  
糾居黝反

初公孫無知虐于雍廩注雍廩齊大夫

為殺無知傳音義

廩力  
錦反

經九年春齊人殺無知注無知弑君而立未列於會故

不書爵例在成十六年疏

注正義曰無知弑君自立則是為齊君矣而不言弑其君

者為未列於會故不書爵不書爵者正謂不書弑其君也釋例曰諸侯不受先君之命而篡立得與諸侯會者則以成君書之齊商人蔡侯般之屬是也若未得接於諸侯則不稱爵楚公子棄疾殺公子比蔡人殺陳佗齊人殺無知衛人殺州吁公子瑕之屬是也諸侯篡立雖以會諸侯為正此列國之制也至於國內策名委質即

君臣之分已定故雖殺不成君亦與成君同義也是言殺而不稱君之意也曹伯負芻殺大子而自立成十五年晉侯討而執之十六年曹人請于晉曰若有罪則君列諸會矣是列會則成君故指彼以為例

公及齊大夫盟于莒注齊亂無君故大夫得敵於公益

欲迎子糾也來者非一人故不稱名莒魯地琅邪繒縣

北有莒亭音義

繒其器反疏注正義曰僖二十九年傳

子男可也是大夫不得敵公也若敵公則經沒公不書而貶卿稱人翟泉之盟是也此不沒公者齊亂無君故大夫得敵公既得敵公當書名氏而直言齊大夫者來者非一人故不稱名也文七年宋人殺其大夫傳曰不稱名衆也是衆則不得書名

夏公伐齊納子糾疏

正義曰公羊傳曰糾者何公子糾也何以不稱公子君前臣名也何

休曰嫌當為齊君在魯君前不為臣禮故去公子見臣於魯也賈逵云不言公子次正也公羊之說不可通於左氏次正不稱公子其事又無所出案今定本經文糾之上且有子字自外入內不稱公子者多唯有楚公子比稱公子蓋告辭有詳畧故為文不同此有伐齊之文故不須言于齊納捷菑于邾為無伐邾之文故須言于邾

齊小白入于齊注二公子各有黨故雖盟而迎子糾

當須伐乃得入又出在小白之後小白稱入從國逆之

文本無位疏

注正義曰傳稱鮑叔牙以小白奔莒管夷吾召忽奉子糾來奔則二子在國寵均勢

敵故國內各有其黨今齊大夫來盟于莒直是子糾之黨來迎子糾耳小白之黨猶自向莒迎小白也若其舉



國同心共推子糾來迎即宜付之不須以盟要之今既與之盟而興師送糾是二公子各自有黨須伐乃得入故公伐齊也昭十三年傳稱桓公有國高以為內主則國子高子是小白之黨也彼迎小白既早公送子糾又遲公伐齊納子糾始行即書小白入齊得告乃書故至齊之時出小白之後也傳例曰凡去國國逆而立之曰入小白稱入從國逆之文以其本無位也若本有位則當云復歸賈服以為齊大夫來迎子糾公不亟遣而盟以要之齊人歸迎小白謂迎小白者還是盟說大夫故杜言各自有黨以排之

秋七月丁酉葬齊襄公注無傳九月乃葬亂故

八月庚申及齊師戰于乾時我師敗績注小白既定而公猶不退師歷時而戰戰遂大敗不稱公戰公敗諱之

乾時齊地時水在樂安界岐流旱則竭涸故曰乾時音

義

乾音干岐其宜反又巨移反涸戶各反

疏

注正義曰公以夏伐齊已出小白之後齊人得葬襄公便

是國寧位定公可退而不退戰而敗績是公之罪時史書策不稱公戰公敗為公諱也若言此戰非公是將卑師衆故直言師戰師敗耳此戰雖諱猶書敗升陘之戰敗亦不書者彼為獲公胄恥諱之深故不書敗也

九月齊人取子糾殺之注公子為賊亂則書齊實告殺

而書齊取殺者時史惡齊志在譎以求管仲非不忍其

親故極言之音義

惡烏路反譎古穴反

疏正義曰此名糾耳稱子糾者公羊傳曰其稱子糾

何貴也其貴奈何宜為君者也何休云以君薨稱子某言之者著其宜為君從未踰年君例賈逵云稱子者愍

之案定本上納子糾已稱子則此言子非慙之也沈云齊人稱子糾故魯史從其所稱而經書子糾知者傳云子糾親也請君討之豈復是慙之乎劉與賈同注正義曰諸侯之臣為卿乃見經公子為賊亂者則書其名不問位之貴賤釋例曰禍福不告則不書然則國之大事見告則皆承告而書貴賤各以所告為文也福莫大於享國有家禍莫甚於骨肉相殘故公子取國及為亂見殺者亦皆書之不必繫於為卿故子糾意恢以公子見書於經也是說公子書經之意也

冬浚洙注無傳洙水在魯城北下合泗浚深之為齊備

音義

浚藕俊反深也洙音殊水名泗音四疏注正義曰釋例云洙水出魯國東北西南入沅水下合泗

公羊傳曰洙者何水也浚之者何深之也曷為深之畏齊也是畏齊故深之為阻固也

傳九年春雍廩殺無知○公及齊大夫盟于饒齊無

君也○夏公伐齊納子糾桓公自莒先入注桓公小

白○秋師及齊師戰于乾時我師敗績公喪戎路傳

乘而歸注戎路兵車傳乘乘他車音義

喪息浪反傳直專反又丁

戀反傳乘繩證反注傳乘字同乘他如字

○秦子梁子以公旗辟于下道

注二子公御及戎右也以誤齊師音義

辟音避本亦作避一音婢

亦反是以皆止注止獲也鮑叔帥師來言曰子糾親也

請君討之注鮑叔乘勝而進軍志在生得管仲故託

不忍之辭管召讐也請受而甘心焉注管仲射桓公

故曰讐甘心言欲快意戮殺之音義

召詩照反讐市由反射食亦反

乃殺子糾于生竇注生竇魯地音義

竇音豆

召忽死之

管仲請囚鮑叔受之及堂阜而稅之注堂阜齊地東

莞蒙陰縣西北有夷吾亭或曰鮑叔解夷吾縛於此

因以為名音義

稅本又作說同土活反一音失銳反解古買反縛扶畧反

歸而以

告曰管夷吾治於高傒注高傒齊卿高敬仲也言管

仲治理政事之才多於敬仲音義

治直吏反注同傒音兮

使相

可也音義

相息亮反

疏

正義曰此傳大畧世有管子書者或足後人所錄其言甚詳其小匡

篇曰桓公自莒反於齊使鮑叔牙為宰鮑叔辭曰君有加惠於臣使臣不凍餒則是君之賜也若必治國

家則非臣之所能也其唯管夷吾乎臣之所不如夷

吾者五寬惠愛民臣不如也治國不失秉臣不如也

忠信可結於諸侯臣不如也制禮義可法於四方臣

不如也介冑執枹立於軍門使百姓皆加勇臣不如

也夫管子民之父母也將欲治其子不可棄其父母

公曰管夷吾親射寡人中鉤殆於死今乃用之可乎

鮑叔曰彼為其君勤也君若宥而反之其為君猶是

也公曰然則為之奈何鮑叔曰君使人請之魯公曰

夫施伯魯之謀臣也彼知吾將用之必不吾與鮑叔

曰君詔使者曰寡君有不令之臣在君之國願請之

以致於羣臣魯君必諾且施伯之知夷吾之才必將

致魯之政夷吾受之則魯能弱齊矣夷吾不受彼知

其將反齊必殺之君亟請之不然無及公乃使鮑叔  
行成曰公子糾親也請君討之魯人為殺公子糾又  
曰管仲讐也請受而戮之魯君許諾施伯謂魯侯曰  
勿與非戮之也將用其政也管仲天下之賢人今齊  
求而得之則必長為魯國憂君何不殺之而授其屍  
魯君曰諾將殺管仲鮑叔進曰殺之齊是戮齊也殺  
之魯是戮魯也寡君願生得之以徇於國為羣臣戮  
若不生得是君與寡君之賊比也非敝邑之所請也  
使臣不敢受命於是乎魯君乃不殺遂生束縛而以  
與齊鮑叔受而哭之三舉施伯從而笑之謂大夫曰  
管仲必不死矣鮑叔之不忍戮賢人其知知稱賢以  
自成也至於堂阜之上鮑叔後而浴之三桓公親迎  
於郊遂與歸禮之於廟三酌而問為政焉外傳齊語  
與管子大同管子當是本耳管子無治於高傒之言  
鮑叔之美管子其言非一

公從之

經十年春王正月公敗齊師于長勺注齊人雖成列魯

以權譎稽之列成而不得用故以未陳為文例在十一

年長勺魯地音義

勺上酌反陳直觀疏注正義曰例稱反十一年經注同敵未陳曰敗某

師皆陳曰戰此傳稱齊人成陳擊鼓不應稱敗齊師故解之孫子兵書曰誓稽之使失其先後謂稽留彼敵不時與戰使先後失其次第魯以曹劌之語權謀譎詐以稽留之列成而不得用與未陳相似故以未陳為文釋例曰長勺之役雖俱陳而鼓音不齊檣李之役越人患吳之整以死士亂吳雖皆已陳猶以獨克為文舉其權詐是也此注稽或作掩誤耳今定本作稽

二月公侵宋注無傳侵例在二十九年



三月宋人遷宿注無傳宋強遷之而取其地故文異於

邢遷音義

強其  
丈反

夏六月齊師宋師次于郎注不言侵伐齊為兵主背莒

之盟義與長勺同音義

背音佩  
傳同

疏

注正義曰此春敗齊  
師于長勺傳稱齊師

伐我則今次于郎亦是欲來伐我而經並不稱侵伐侵

伐者責罪之文也桓十年齊侯鄭伯來戰于郎傳曰我

有辭也故不稱侵伐則知此與長勺不書侵伐亦為我

有辭也我有辭者齊來伐我為公伐齊納子糾來報伐

也公之伐齊大夫來盟于莒許以子糾為君今魯伐齊

納子糾彼自背盟伐魯非責魯也魯有此辭故齊人不

合伐也杜言二公子各有黨則迎子糾者非小白之徒

而責齊背盟者言彼莒盟大夫背盟而從小自誤公使

伐齊耳不言桓公背盟也杜以傳於長勺之役有伐我之語故就傳為解而以此同之

公敗宋師

于乘丘注乘丘魯地音義

乘繩證反

秋九月荆敗蔡師于莘注荆楚本號後改為楚楚辟陋

在夷於此始通中國然告命之辭猶未合典禮故不稱

將帥莘蔡地音義

莘所中反將率于匪反率又作帥同所類反

疏

注正義曰荆楚一本

二名故以為國號亦得二名終莊公之世經皆書荆僖之元年乃書楚人伐鄭蓋於爾時始改為楚以後常稱楚也他國雖將有尊卑師有多少或稱師或稱將不得直書國名史之書策承彼告辭此直稱國知其告命之辭未合典禮故

以蔡侯獻舞歸注獻舞蔡季疏

正義曰殺梁傳

不稱將帥也

曰以歸猶愈乎執也杜於隱七年注云但言以歸非執也則以歸者直將與共歸不被囚執其恥輕於執也釋例得獲例曰敵國交兵亦有兵器之獲欲殊別君臣故於君曰滅於臣曰獲國君者社稷之主百姓之望當與社稷宗廟共其存亡者也而見獲於敵國雖存若亡死之與生皆與滅司至於偏軍元帥君之臣僕出身致命榮辱得失自其常事故傳曰胡子髡沈子逞滅獲陳夏齧君臣之辭也如杜此言師敗身虜亦應稱滅此不言滅而云以歸者釋例所云據宗廟社稷已亡而君見獲於敵君身雖在與亡無異皆以滅為文則定六年鄭游速帥師滅許以許男斯歸是也若社稷宗廟不亡君身見獲於敵則云以歸此蔡侯獻舞歸是也劉炫云在陳死則稱滅以還者則言以歸以規杜氏非也

冬十月齊師滅譚注譚國在濟南平陵縣西南傳曰譚

無禮此直釋所以見滅經無義例他皆放此滅例在文

十五年音義

譚徒南反

譚子奔莒注不言出奔國滅無所出

疏

注正義曰公羊傳曰何以不言出國已滅矣無所出也

傳十年春齊師伐我注不書侵伐齊背莒之盟我有

辭公將戰曹劌請見注曹劌魯人音義

劌古衛反見賢遍反下同

疏

注正義曰史記作曹沫亦云魯人

其鄉人曰肉食者謀之又何間

焉注肉食在位者間猶與也音義

間間廁之間注同與音預

疏正

義曰孟子論庶人云五畝之宅樹之以桑五十者可以衣帛雞豚狗彘之畜無失其時七十者可以食肉

是賤人不得食肉故云在位者也襄二十八年傳說  
子雅子尾之食云公膳日雙雞昭四年傳說頒冰之  
法云食肉之祿冰皆與焉大夫命婦喪浴用冰蓋位  
為大夫乃得食肉也間謂間雜言不應間其中而為  
之謀故云  
劇曰肉食者鄙未能遠謀乃入見問何以

戰公曰衣食所安弗敢專也必以分人

正義曰公意衣食二

者雖所以安身然亦不敢專已有之必以之分人

對曰小惠未徧民弗從也

注分公衣食所惠不過左右故曰未徧音義

徧音遍注同

公曰犧牲玉帛音義

犧許宜反

疏

正義曰四者皆祭神之物曲禮曰天子以犧牛

諸侯以肥牛鄭玄云犧純毛也肥養於滌也然則牲謂三牲牛羊豕也犧者牲之純色也魯自得用天子

之禮要犧牲相配之語  
未必為得用乃言之也

弗敢加也必以信注祝辭不

敢以小為大以惡為美對曰小信未孚神弗福也注

孚大信也疏

注正義曰孚亦信耳以言小信  
未孚故解孚為大信以形之

公曰小

大之獄雖不能察必以情注必盡己情察審也對曰

忠之屬也注上思利民忠也音義

屬音蜀

疏

注正義曰  
桓六年傳

文也言以情審察不用使之有枉  
則是思欲利民故為忠之屬也

可以一戰戰則請

從公與之乘注共乘兵車音義

從才用反  
乘繩證反

戰于長勺

公將鼓之劓曰未可齊人三鼓劓曰可矣齊師敗績

公將馳之。蒯曰：「未可。」下視其轍，注視車跡也。音義三息

暫反。又如字。

登軾而望之，疏。

正義曰：考工記云：「兵車之廣六尺，有六寸三分。」

車廣去一，以為隧。隧謂與內前後深四尺四寸也。三分其隧，一在前，二在後，以揉其式。式在輿間，從前量之，深一尺四寸三分寸之二也。以其廣之半為之式，崇崇三尺三寸也。謂當車輿之內，去前軫一尺四寸三分寸之二，下去車板三尺三寸，橫施一木，名之曰軾，得使人立於其後，時依倚之。曹蒯登軾，得臣云：「君謂此也。」

曰：「可矣。」遂逐齊師。既克，公問其故。對曰：「夫戰，

勇氣也。一鼓作氣，再而衰，三而竭。彼竭我盈，故克之。

夫大國難測也，懼有伏焉。注恐詐奔。音義

軾音式，伏如字。舊扶。

反又吾視其轍亂望其旗靡故逐之注旗靡轍亂怖遽

音義

旗音其靡音美怖普布反遽其據反

○夏六月齊師宋師次于郎

公子偃曰宋師不整可敗也注公子偃魯大夫宋敗

齊必還請擊之公弗許自雩門竊出蒙臯比而先犯

之注雩門魯南城門臯比虎皮音義

雩音于比音毗注同疏注正

義曰雩門為魯南城門蓋時人猶以名之故知也僖二十八年傳稱胥臣蒙馬以虎皮此云蒙臯比而先犯之事與彼同知臯比是虎皮也以胥臣之事譬之必知定是虎皮其名曰臯比則其義未聞樂記云倒載干戈包之以虎皮名之曰建櫜鄭玄以為兵甲之衣曰櫜櫜韜也而其字或作建臯故服虔引以解此



公從之大敗宋師于乘丘齊師乃還○蔡哀侯娶于

陳息侯亦娶焉息嬀將歸過蔡蔡侯曰吾姨也注妻

之姊妹曰姨疏

注正義曰釋親云妻之姊妹同出為姨孫炎云同出俱已嫁也

止而

見之弗賓注不禮敬也息侯聞之怒使謂楚文王曰

伐我吾求救於蔡而伐之楚子從之秋九月楚敗蔡

師于莘以蔡侯獻舞歸○齊侯之出也過譚譚不禮

焉及其入也諸侯皆賀譚又不至注以九年入音義

過古禾反冬齊師滅譚譚無禮也譚子奔莒同盟故也注

傳言譚不能及遠所以亡

春秋左傳注疏卷七

春秋左氏傳注疏卷七考證

單伯送王姬疏成公以下常稱單子○常監本訛當今  
改正

齊師遷紀邾邾注北海都昌縣西有訾城○  
臣召南

按此解邾邑也後書郡國志北海都昌注引齊遷紀  
之邾城地道記曰邾城在縣西是也邾音同訾故釋  
文同音子斯反

傳不稱姜氏絕不為親禮也○  
臣召南按文姜親與弑

桓之謀莊公當以父之義絕其為母此左氏意與二傳不異者也杜注支離迂遠

公子慶父帥師伐於餘丘注於餘丘國名也○臣浩按

啖助亦主杜說公羊以為邾婁之邑劉敞駁之孫復謂是附庸國呂祖謙謂是夷國若於越然又按左傳於莊公一代記事最少甚至一年但有一事餘俱無傳當由所見魯史亦闕失不全耳

紀季以鄆入于齊注鄆紀邑在齊國東安平縣○臣召

南  
按東安平前漢屬菑川國後漢屬北海國前志注  
引孟康曰今鄆亭是也後志注引此傳東萊集解引  
此注無東字誤也

傳鄭伯辭以難注厲公在櫟故○趙汭補注曰陳氏云  
杜氏厲公在櫟故說非是鄭伯即厲公今按杜氏疑  
下年遇垂鄭伯為子儀汭按齊侯殺子亶而祭仲立  
子儀子儀非齊侯所立陳侯又突之黨二國必不成  
子儀為君而與之會此鄭伯為厲公無疑杜氏并失

傳意

傳莫敖以王命入盟隨侯疏莫敖既與隨侯盟且又請  
隨侯與己為會禮於漢水之汭而後還楚也○監本  
作且又請隨侯畏楚為會禮於漢水之汭而我還楚  
也殊不可解今依古本改

郢犁來來朝注附庸國也東海昌慮縣東北有郢城○

臣浩

按後書郡國志注引此作昌慮縣所治城東北

有郢城郢小邾國也

傳楚復伐鄧滅之○陳傳良曰于此見傳終書之體趙  
汧曰按傳記楚滅凡十一國見宣十二年傳注

春夫人姜氏會齊侯于防○監本春字下行一秋字今  
去

傳星隕如雨與雨偕也○臣召南按如雨公羊穀梁皆  
謂衆星散落如雨之多惟左氏作而雨解

傳齊侯使連稱管至父戍葵丘注齊地臨淄縣西有地  
名葵丘○臣召南按此與桓公會諸侯之地不同故

杜別解

傳初公孫無知虐於雍廩○

臣浩

按此九年傳雍廩殺

無知之首句也左傳初與經文各自成書故每有隔  
年連合之傳自杜預合為經傳集解始離傳以從經  
于每年之首即自畫斷多所間隔此傳其尤著者也

傳秦子梁子以公旗辟于下道○

臣召南

按此直接上

公傳乘而歸本一傳也各本俱用一圈畫斷未詳其

義



齊師滅譚注譚國在濟南平陵縣西南○  
臣召南按漢

志作東平陵

春秋左氏傳注疏卷七考證

謹案第九頁前五行疏請後五廟刊本監本毛本  
後訛復據宋本及公羊傳改

前七行疏欲以襲之諸本欲訛侯據宋本改

第十頁後四行疏書次者皆善之諸本書訛事據  
宋本改

第十四頁後一行疏故兩為之音諸本故訛或據  
宋本改

第三十五頁前行疏三分寸之二也刊本二訛

三第五行同今並改

欽定四庫全書

覆校官編修臣張秉愚

校對官修撰臣張書勳

謄錄監生臣周志禮

欽定四庫全書薈要

經部

左傳注疏卷八

詳校官原任侍講臣王燕緒



欽定四庫全書薈要卷一千一百二十四

經部

春秋左傳注疏卷八

起莊公十一年  
盡二十二年

晉杜氏注 唐陸德明音義 孔穎達疏

經十有一年春王正月注無傳

夏五月戊寅公敗宋師于鄆注鄆魯地傳例曰敵未陳

曰敗某師音義

鄆子  
斯反

疏正義曰往年公敗宋師于乘丘  
今為乘丘之役侵我則是報復

前怨魯當無辭亦不稱侵伐者莊立以來未嘗犯宋宋  
黨齊伐我故敗于乘丘今復重来更是宋之可責非魯

也罪

秋宋大水注公使弔之故書

冬王姬歸于齊注魯主昏不書齊侯逆不見公

傳十一年夏宋為乘丘之役故侵我公禦之宋師未陳而薄之敗諸鄆凡師敵未陳曰敗某師注通謂設

權譎變詐以勝敵彼我不得成列成列而不得用故

以未陳獨敗為文音義

為乘于偽反陳直疏注正義  
觀反下及注皆同曰設權

譎變詐以勝敵者謂若長勺之役待齊人三鼓氣衰乃擊之定十四年構李之役越子患吳之整使罪人屬劍自剄吳師屬之目越子因而伐之此二者敵雖已陳設權勝之成列而不得用也此及昭元年晉荀



吳敗狄于大鹵傳皆云未陳而薄之是其未成列也  
彼我不得成列與成列而不得用皆以未陳獨敗為  
文言彼不能拒而此獨克之也昭五年叔弓敗莒師  
于蚡泉傳曰莒未陳也此已發例彼復發者釋例曰  
魯敗宋莒再發未陳之  
例者嫌君臣有異也 皆陳曰戰注堅而有備各得

其所成敗決于志力者也疏

注正義曰戰者共鬪之辭彼此成列權無所施

故為各得其所成敗決於志力者也兩國交戰必有  
勝負或有未至成敗各自收斂故有言戰不言敗者  
桓十年齊侯鄭伯來戰于郎十二年及鄭師伐宋丁  
未戰于宋如此之類交戰而未至於敗故不書敗也  
或有彼實未陳應從未陳之例亦書戰者或有實敗  
而不書敗者皆從告辭也釋例曰令狐之役晉人潛  
師夜起而書戰者晉諱背其前意而夜薄秦師以戰  
告也河曲之戰秦晉交綏長岸之戰吳楚兩敗交綏

並退軍士未慙吳楚俱病莫肯以告故皆書戰而不書敗也邲之戰上軍先陳林父乃敗故書戰又書敗也

大崩曰敗績注師徒撓敗若沮岸崩山喪其功績

故曰敗績音義

撓乃孝反一音乃巧反沮在呂反壞也一音子餘反岸崩謂之沮喪息浪

反

疏注正義曰師徒撓敗成二年傳文穀梁傳曰高曰崩厚曰崩解其師非高厚而稱崩意沮訓壞

也沮岸謂河岸崩也師旅大敗似岸崩山崩也績訓為功喪其功績故曰敗績唯成十六年言楚子鄭師敗績者釋例曰鄢陵之戰楚師徒未大崩楚子傷目而退故指事而言也言楚子身敗非師敗也故言楚子敗績僖十五年晉侯及秦伯戰于韓獲晉侯其君被獲而不書敗者晉侯戎馬還渚而止為秦所獲師不大崩故不書敗也城濮之戰傳稱楚左右師潰子玉收其卒而止故不敗是二軍敗而經書敗績鄢陵

之戰傳稱子反曰臣之卒實奔是一軍敗而杜云師未大崩然敗績者是大崩之名敗多存少乃稱敗績敗少存多則得僞曰克注謂若太叔段之比才力足不稱敗績也

以服衆威權足以自固進不成為外寇強敵退復狡壯有二君之難而實非二君克而勝之則不言彼敗

績但書所克之名音義

僞音俊本或作俊比必利反復扶又反狡壯交卯反下測

亮反難疏

注正義曰克訓勝也

戰勝其師獲得其軍乃但反疏內之雄僞者故云得僞曰克春秋稱克者

唯有叔段一事而已既非敵國相伐又非君之討臣而於戰陳之例別立此名彼傳復云如二君故曰克故具迹叔段之事以克之凡例乃是舊典非獨為段發故云叔段之比釋例與此盡同

覆而敗

之曰取某師注覆謂威力兼備若羅網所掩覆一軍

皆見禽制故以取為文疏

注正義曰取謂盡取無遺漏之意也哀九年宋皇瑗

取鄭師于雍丘傳稱皇瑗圍鄭師每日遷舍壘合鄭師哭是自知盡死無逃逸之路也又曰使有能者無死是其合軍之內死生在宋也取狀如此而云覆而敗之知其如羅網掩覆一軍皆見禽制故以取為文服虔云覆隱也設伏而敗之謂攻其無備出其不意敵人不知敗之易故曰取即如服言與未陳何異而別以為例謂之取也荀吳敗狄于大原於越敗吳于檇李並攻其無備出其不意而經不言取鄭二公子敗燕師于北制鄭人大敗戎師是設伏敗之而傳不言取服謂此為取何也宋圍鄭師壘合而哭自知必敗非敵人不知  
京師敗曰王師敗績于某注王者無而書取何也

敵於天下天下非所得與戰者然春秋之世據有其

事事列於經則不得不因申其義有時而敗則以自

敗為文明天下莫之得校音義

京師敗本或作京師敗績者非校音教

疏

正義曰此亦周公舊凡杜解舊凡之意得有王師敗績者以周公制禮理包盛衰故周禮載大喪

及王師不功之事故舊凡例有敗績之文杜以尊卑逆順言之天王不應有戰敗之事遂申說凡例故云

無敵於天下天下非所得與戰者然春秋之世據有其事成元年王師敗績于茅戎是事列於經丘明不

得不因申舊凡之義蘇氏之說義亦如此沈氏不解杜意以京師敗績非周公舊凡是孔子新意丘明為

傳不得不因申孔子新意之義劉炫亦不達杜旨謂杜與沈氏意同非也

○秋宋大水公

使弔焉曰天作淫雨害于粢盛若之何不弔注不為天所愍弔對曰孤實不敬天降之災又以為君憂拜命之辱注謝辱厚命臧文仲曰宋其興乎注臧文仲

魯大夫禹湯罪已其興也淳焉注淳盛貌音義淳蒲忽反

一作紂桀紂罪人其亡也忽焉注忽速貌音義紂直疏紂同

正義曰湯誥云其爾萬方有罪在予一人是罪已也泰誓數紂之罪云焚炙忠良剗剔孕婦是罪人也禹桀之時書多已矣固亦應有此事沈引帝王世紀云禹見罪人下車泣之是罪已也桀殺闕龍逢是罪人也  
且列國有凶稱孤禮也注列國諸侯無凶則常稱

寡人疏

注正義曰列國謂大國也曲禮曰庶方小侯自稱曰孤諸侯與民言自稱曰寡人其在凶

服曰適子孤鄭玄云與臣言亦自謂寡人是無凶則常稱寡人有凶則稱孤也

言懼而名禮

其庶乎注言懼罪已名禮稱孤其庶庶幾於興音義

言懼而名禮絕句者非既而聞之曰公子御說之辭也注或以名絕句者非

宋莊公子音義

御魚呂反本或作禦說音悅

臧孫達曰是宜為君

有恤民之心疏

正義曰謂御說明年為君之後方始聞之聞之時已為君故云是人宜其

為君也傳以御說有禮故以此言實之

○冬齊侯來逆共姬注齊桓公

也音義

共音恭

○乘丘之役注在十年公以金僕姑射

南宮長萬注金僕姑矢名南宮長萬宋大夫音義

射食

亦反長疏注正義曰用之射人必知

公右欵孫生搏

之注搏取也不書獲萬時未為卿音義

欵市專反搏音博

疏

正義曰檀弓云魯莊公及宋人戰于乘丘縣賁父御  
卜國為右車右與此不同者禮記後人所錄聞於所  
聞之口其事未必實也案傳云公子偃先犯宋師公  
從而大敗之則本非交戰禮記稱馬驚敗績公隊佐  
車授綏御與車右皆死之必如記言則是魯師敗績  
安得稱公敗宋師于乘丘傳記不同固當記文妄耳

宋人請之宋公靳之注戲而相愧曰靳魯聽其得還

音義

靳居疏注正義曰服虔云恥而惡之曰靳傳稱

觀反

疏

宋人請之若是恥惡其人不應為之請



魯故杜以為戲而相愧曰靳鄭玄注禮記儒行云遭人名為儒而以儒靳故相戲俗有靳故之語知是戲而相愧之名也公羊傳以為宋萬與閔公博婦人皆在側萬曰甚矣魯侯之淑魯侯之美閔公矜此婦人妬其言曰此虜也魯侯之美惡乎至何休云惡乎曰至猶何所至萬怒搏閔公絕其脰是其靳之事也曰始吾敬子今子魯囚也吾弗敬子矣病之注萬不以為戲而以為已病為宋萬弑君傳

經十有二年春王三月紀叔姬歸于鄆注無傳紀侯去國而死叔姬歸魯紀季自定於齊而後歸之全守節義以終婦道故繫之紀而以初嫁為文賢之也來歸不書

非寧且非大歸音義

鄒音

疏

注正義曰公羊傳曰其言歸于鄒何隱之也何隱爾

其國亡矣徒歸于叔爾穀梁傳曰其曰歸何吾女也失國喜得其所故言歸焉爾杜略取彼意為說釋例與此盡同大意以其賢愍其國亡乃依附於叔故書之耳

夏四月

秋八月甲午宋萬弑其君捷及其大夫仇牧注捷閔公

不書葬亂也萬及仇牧皆宋卿仇牧稱名不警而遇賊

無善事可褒音義

警居

疏

注正義曰隱十一年公羊傳曰君弑臣不討賊非臣也子

不復讐非子也葬生者之事也春秋君弑賊不討不書葬以為不繫乎臣子也左氏無此義故杜明之不書葬

為亂故也凡葬魯不會則不書若使宋亂不葬魯本無可會之理兼見此義故言亂也萬及仇牧並名見於經知皆卿也萬不書氏者釋例曰宋萬賈氏以為未賜族案傳稱南宮長萬則為已氏南宮不得為未賜族也推尋經文自莊公以上諸弑君者皆不書氏閔公以下皆書氏亦足明時史之異同非仲尼所皆貶也是杜意以為史有詳略無義例也文八年宋人殺其大夫司馬傳曰司馬握節以死故書以官然則有善可褒當變文以見義此仇牧書名不警而遇賊無善可褒故不變其文公羊善其不畏彊禦故言此以異之

冬十月宋萬出奔陳注奔例在宣十年

傳十二年秋宋萬弑閔公于蒙澤注蒙澤宋地梁國

有蒙縣疏

注正義曰昭十三年楚弑其君虔于乾谿書地此弑閔公于蒙澤不書地者釋例曰

先儒旁采二傳橫生異例宋之蒙澤楚之乾谿俱在  
國內閔公之弑則以不書蒙澤國內為義楚弑靈王  
復以地乾谿為失所明仲尼本不以為義例明遇仇  
丘明亦無異文也是亦言史自詳略無義例也

牧于門批而殺之注手批之也音義

批普迷反又蒲穴反字林云擊

也父節反

遇大宰督于東宮之西又殺之注殺督不書宋

不以告音義

大音泰

立子游注子游宋公子疏

注正義曰世族

譜子游雜人不  
知何公之子

羣公子奔蕭公子御說奔毫注蕭宋

邑今沛國蕭縣毫宋邑蒙縣西北有毫城音義

毫步各反

南宮牛猛獲帥師圍毫注牛長萬之子猛獲其黨也

○冬十月蕭叔大心注叔蕭大夫名疏

注正義曰卿大夫采邑之

長則謂之宰公邑之長則曰大夫此則是宋蕭邑大夫也以此年有功宋人以蕭邑別封其人為附庸二

十三年經書蕭叔朝公附庸例稱名故杜以叔為名及戴武宣穆莊之族注宋

五公之子孫以曹師伐之殺南宮牛于師殺子游于

宋立桓公注桓公御說猛獲奔衛南宮萬奔陳以乘

車輦其母一日而至注乘車非兵車駕人曰輦宋去

陳二百六十里言萬之多力音義

南宮萬奔陳本或作長萬長衍字也

下亦然乘繩證反註同

宋人請猛獲于衛衛人欲勿與石祁子

曰不可注石祁子衛大夫天下之惡一也惡于宋而保于我保之何補得一夫而失一國與惡而棄好非

謀也注宋衛本同好國音義

反呼報反註同

衛人歸之亦請

南宮萬于陳以賂疏

正義曰斷以賂為句言用賂請于陳也請猛獲于衛不言以賂

蓋於衛無賂

陳人使婦人飲之酒而以犀草裹之比及宋

手足皆見宋人皆醢之注醢肉醬并醢猛獲故言皆

音義

亦請南宮長萬于陳以賂絕句飲於鵠反犀音西裏音果比必利反見賢遍反醢音海

經十有三年春齊侯宋人陳人蔡人邾人會于北杏注

北杏齊地音義

杏戶  
猛反

夏六月齊人滅遂注遂國在濟北蛇丘縣東北音義

蛇音

移

秋七月

冬公會齊侯盟于柯注此柯今濟北東阿齊之阿邑猶

祝柯今為祝阿音義

柯古  
何反

傳十三年春會于北杏以平宋亂注宋有弑君之亂

齊桓欲修霸業疏

注正義曰桓二年會于稷以成宋亂者為會之意欲平除宋督弑君

之賊此云平宋亂者宋萬已誅宋新立君其位未定齊桓欲脩霸業為會以安定之非欲平除新君故宋人聽命來列于會也遂人不至○夏齊人滅遂而戍之注戍守

也○冬盟于柯始及齊平也注始與齊桓通好音義

好呼報反

○宋人背北杏之會音義

背音佩十四年經註同

經十有四年春齊人陳人曹人伐宋注背北杏會故

夏單伯會伐宋注既伐宋單伯乃至故曰會伐宋單伯

周大夫疏

注正義曰傳稱諸侯伐宋齊請師于周則伐事已成單伯始至故云會伐宋言來就宋地

會之也元年注云單伯天子卿也此云

周大夫者大夫亦卿之總號故兩言之



秋七月荆入蔡注入例在文十五年

冬單伯會齊侯宋公衛侯鄭伯于鄆注鄆衛地今東郡

甄城也齊桓脩霸業卒平宋亂宋人服從欲歸功天子

故赴以單伯會諸侯為文音義

于鄆音絹甄城音絹一音真或音旃又舉然反

或作

疏正義曰春秋因魯史之文魯史自書其事會他

鄆

國者皆言已往會之不問君之與臣會諸侯者

皆魯人在會字之上若微人往會則會上無字直言其

會明魯往會之微人不合書名書其所為之事而已十

六年會齊侯宋公陳侯衛侯鄭伯許男滑伯滕子同盟

于幽是也若魯人不與而諸侯自會則并序諸侯言會

于某十五年齊侯宋公陳侯衛侯鄭伯會于鄆是也雖

霸主召會諸侯霸主之身列在諸侯之上耳不言霸主

會諸侯以其俱是王臣不得與諸侯為主故也若霸主之國遣大夫往會諸侯雖政在霸國大夫名列諸侯之下由非諸侯之主列位從其班爵文十四年公會宋公陳侯衛侯鄭伯許男曹伯晉趙盾同盟于新城是也若王臣在會不問尊卑皆列諸侯之上僖八年公會王人齊侯宋公衛侯許男曹伯陳世子款盟于洮九年公會宰周公齊侯宋子衛侯鄭伯許男曹伯于葵丘是也此會魯人不與單伯宜列在諸侯之上下言會于鄆耳今會字乃在齊侯之上是齊桓歸功天子故赴以單伯會諸侯為文所以尊天子示名義也此會魯自不與魯所與者皆魯人在上史文以魯為主耳當會之時以大小為序魯不在上也釋例曰魯為春秋主常列諸侯上非其實次也子帛卿也依魯大夫之比列於莒上故傳曰魯故也叔孫豹曰宋衛吾匹也又曰諸侯之會寡君未嘗後衛君是魯在衛上也宋既先代之後又襄公一合諸侯以紹齊桓之伯宋在齊上則魯次宋也

傳十四年春諸侯伐宋齊請師于周注齊欲崇天子

故請師假王命以示大順經書人傳諸侯者總衆國

之辭疏

注正義曰齊既以諸侯伐宋而更請師于周者齊桓始脩霸業方欲尊崇天子故請師假

王命以示大順耳非慮伐不克而藉王威也經書人而傳言諸侯先儒以為諸如此輩皆是諸侯之身釋

例曰傳滅入例衛侯燬滅邢同姓故名又云穀伯綏鄧侯吾離來朝名賤之也又云不書蔡許之君乘楚

車也謂之失位此皆貶諸侯之例例不稱人也諸侯在事傳有明文而經稱人者凡十一條丘明不示其

義而諸儒皆據案生意原無所出貶諸侯而去爵稱人是為君臣同文非止等差之謂也又澶淵大夫之

會傳曰不書其人案經皆去名稱人至諸侯親城緣陵傳亦曰不書其人而經總稱諸侯此大夫及諸侯

經傳所以為別也通校春秋自宣公五年以下百數  
十年諸侯之咎甚多而皆無貶稱人者益明此蓋當  
時告命記註之異非仲尼所以為例故也是言諸侯  
之貶或書名或沒而不書必不得稱人故以此經書  
人傳言諸侯為總衆國之辭僖元年齊師宋師曹師  
救邢於例將卑師衆稱師則三國皆大夫帥也傳稱  
諸侯救邢亦是總衆  
國之辭與此同也  
夏單伯會之取成于宋而還○

鄭厲公自櫟侵鄭注厲公以桓十五年入櫟遂居之

音義

櫟音歷

及大陵獲傳瑕注大陵鄭地傳瑕鄭大夫

傳瑕曰苟舍我吾請納君與之盟而赦之六月甲子

傳瑕殺鄭子及其二子而納厲公注鄭子莊四年稱

伯會諸侯今見殺不稱君無諡者微弱臣子不以君

禮成喪告諸侯音義

含音捨鄭子子儀

初內蛇與外蛇鬪於

鄭南門中內蛇死六年而厲公入疏

正義曰服虔云蛇北方水物水

成數六故六年而厲公入

公聞之問于申繻曰猶有妖乎對曰人

之所忌其氣燄以取之妖由人興也注尚書洛誥無

若火始燄燄未盛而進退之時以喻人心不堅正音

義

蛇市奢反繻音須妖於驕反燄音豔誥古報反

人無釁焉妖不自作人

棄常則妖興故有妖音義

釁許疏正義曰公聞厲公斬反疏之入問於申繻曰

猶有蛇妖而厲公得入乎古者由猶二字義得通用  
申繻對公曰人之所忌謂子儀畏懼厲公心不堅正  
其畏忌之氣缺缺未盛而進退之時以取此妖來應  
人也蛇鬪之事由人興也若使人無罅隙焉則妖孽  
不能自作人棄其常則妖自興以此故有厲公入遂  
妖棄常謂既不能彊又不能弱失常度也

殺傅瑕使謂原繁曰傅瑕貳注言有二心於已周有  
常刑既伏其罪矣納我而無二心者吾皆許之上大  
夫之事吾願與伯父圖之注上大夫卿也伯父謂原  
繁疑原繁有二心且寡人出伯父無裏言注無納我  
之言音義裏音入又不念寡人注不親附已寡人憾

焉對曰先君桓公命我先人典司宗祏注桓公鄭始

受封君也宗祏宗廟中藏主石室言已世為宗廟守

臣音義

憾戶暗反祏音石藏主石函也守手又反疏注正義曰桓公初封

周禮王子母弟有功者得立祖王之廟故桓公始封為君即命臣使典宗祏宗祏者慮有非常火災於廟之北壁內為石室以藏木主有事則出而祭之既祭納於石室祏字從示神之也社稷有主

而外其心其何貳如之苟主社稷國內之民其誰不為臣臣無二心天之制也子儀在位十四年矣注子儀鄭子也而謀召君者庸非貳乎注庸用也莊公之

子猶有八人若皆以官爵行賂勸貳而可以濟事君

其若之何臣聞命矣乃縊而死音義

莊公之子猶有八人傳唯見四

人子忽子疊子儀並死獨厲公在八人名字記傳無聞縊一賜反

○蔡哀侯為莘故

繩息媯以語楚子注莘役在十年繩譽也音義

為莘于偽

反下所巾反語魚據反繩食承反說文作譚譽音餘又如字

疏

注正義曰字書繩作譚字從言訓為

譽

楚子如息以食入享遂滅息注偽設享食之具音

義

食音嗣注同

以息媯歸生堵敖及成王焉未言注未與

王言音義

堵教丁古反下五羔反杜云楚人謂未成君為教史記作杜教

楚子問之



對曰吾一婦人而事二夫縱弗能死其又奚言楚子

以蔡侯滅息遂伐蔡注欲以說息媯音義

說音悅

秋七

月楚入蔡君子曰商書所謂惡之易也如火之燎于

原不可鄉邇其猶可撲滅者其如蔡哀侯乎注商書

盤庚言惡易長而難滅音義

易以豉反注同燎力召反又力弔反鄉許亮反

撲普卜反盤步丹反本又作般長丁丈反

○冬會于鄆宋服故也

經十有五年春齊侯宋公陳侯衛侯鄭伯會于鄆

夏夫人姜氏如齊注無傳夫人文姜齊桓公姊妹父母

在則禮有歸寧沒則使卿寧疏

注正義曰文姜僖公之女故為桓公姊妹詩美

后妃之德云歸寧父母是父母在則禮有歸寧襄十二年傳曰秦嬴歸于楚楚司馬子庚聘于秦為夫人寧禮也是父母沒則使卿寧兄弟不得自歸也但不知今桓公有母以否故杜不明言得失

秋宋人齊人邾人伐郕注宋主兵故序齊上音義

郕五反

鄭人侵宋

冬十月

傳十五年春復會焉齊始霸也注始為諸侯長音義

復扶又反長丁丈反

○秋諸侯為宋伐郕注郕附庸屬宋而叛

故齊桓為之伐鄭音義

為宋子偽反

○鄭人間之而侵宋

音義

間間廁之間一本作聞

經十有六年春王正月

夏宋人齊人衛人伐鄭注宋主兵也班序上下以國大

小為次征伐則以主兵為先春秋之常也他皆放此疏

注正義曰往年齊桓始霸未敢即尸其任救患討罪今

為宋伐鄭仍使宋自報怨故宋主兵序于齊上也諸侯

會許男在曹滑之上班序上下以國大小為次不以爵

之尊卑也隱五年邾人鄭人伐宋附庸在伯爵之上是

以主兵為先也歷檢上下皆然知是春秋常法禮記祭

義云有虞氏貴德而尚齒夏后氏貴爵而尚齒殷人貴

富而尚齒周人貴親而尚齒而春秋序會不先同姓而大國在上者孔子脩春秋有變周之文從殷之質故也

秋荆伐鄭

冬十有二月會齊侯宋公陳侯衛侯鄭伯許男滑伯滕子同盟于幽注書會魯會之不書其人微者也言同盟服異也陳國小每盟會皆在衛下齊桓始霸楚亦始彊陳侯介于二大國之間而為三恪之客故齊桓因而進之遂班在衛上終於春秋滑國都費河南緱氏縣幽宋地音義

介音界為三恪苦各反本或作為三恪之客疏費扶味反又音秘緱古侯反一音苦侯反

注正義曰公羊傳曰同盟者何同欲也穀梁傳曰同者同尊周也杜云服異者亦是同其欲同尊周也書同盟者當盟之時告神稱同釋例曰盟者假神明以要不信故載辭或稱同以服異為言也是言載辭稱同也二十年七年同盟于幽傳曰陳鄭服也文十四年同盟于新城傳曰從於楚者服且謀邾也成五年同盟于蟲牢傳曰鄭服也七年同盟于馬陵傳曰尋蟲牢之盟且莒服故也襄三年同盟于雞澤傳曰晉為鄭服故合諸侯二十年同盟于重丘傳曰齊成故也昭十三年同盟于平丘傳曰齊服也如此之類皆是服異故稱同也喪服繼父不同居傳曰嘗同居乃為異居未嘗同居則不為異居春秋同盟亦猶是也嘗同盟而異乃稱服異未嘗同盟則不為服異故盟不稱同也僖二年齊侯宋公江人黃人盟于貫傳曰服江黃也定四年陳許頊胡楚之屬國皆來會于召陵其下云公及諸侯盟于臯鼬二盟並不稱同皆為未嘗同盟非服異故不稱同也應稱同而

不稱同者僖五年首止之盟鄭伯逃歸七年盟于甯母  
鄭伯使太子華聽命於會而不稱同者鄭心未服故傳  
稱子華請去三族管仲曰君其勿許鄭必受盟是甯母  
之時鄭未服也八年盟于洮鄭伯乞盟傳稱請服也而  
洮盟不稱同者鄭伯始請服耳未列於會故不稱同也  
文十五年夏晉卻缺帥師伐蔡戊申入蔡其冬諸侯盟  
于扈傳稱晉侯宋公衛侯蔡侯陳侯鄭伯許男曹伯盟  
于扈則是蔡新來服不稱同者傳稱卻缺入蔡以城下  
之盟而還是則蔡已先服故不稱同也宣十二年同盟  
于清丘傳曰恤病討貳十七年同盟于斷道傳曰討貳  
也成九年同盟于蒲傳曰為歸汶陽之田故諸侯貳於  
晉晉人懼會于蒲以尋馬陵之盟十五年同盟于戚傳  
曰討曹成公也十七年同盟于柯陵傳曰尋戚之盟也  
十八年同盟于虛朮傳曰謀救宋也此六盟皆非服異  
稱同盟者清丘斷道與蒲於時諸侯已有二心同心討  
貳故稱同盟戚與虛朮同心疾惡故稱同盟柯陵之盟

鄭人不服欲令諸侯同心伐鄭故稱同盟猶襄十八年諸侯同心疾齊稱同圍齊自此以前陳在衛下今在上知齊桓始進之釋例班序譜自隱至莊十四年四十三歲衛與陳凡四會衛在陳上自莊十五年盡僖十七年三十五歲凡八會陳在衛上故知是齊桓進之遂班在衛上終於春秋也

邾子克卒注無傳克儀父名稱子者蓋齊桓請王命以

為諸侯再同盟疏注正義曰北杏之會邾人在焉今而稱子故云蓋齊桓請王命以為諸侯

得為子爵見經也隱元年盟于蔑桓十七年盟于赳是再同盟也

傳十六年夏諸侯伐鄭宋故也注鄭侵宋故音義宋故

也本或作為宋故

○鄭伯自櫟入注在十四年緩告于楚秋

楚伐鄭及櫟為不禮故也鄭伯治與於雍糾之亂者

注在桓十五年音義

為于偽反與音預

九月殺公子閔則強

鉏注二子祭仲黨斷足曰則音義

公子閔安未反案隱十一年鄭有公

孫闕距此三十五年不容復有公子闕若非闕字誤

則子當為孫則音月又五刮反鉏仕魚反斷丁管反

疏

注正義曰周禮司刑則罪五百尚書呂刑則罰之屬五百孔安國云則足曰則釋言云跽則也李巡

曰斷足曰則也說文云則絕也則則則公父定叔出是斷絕之名斬足之罪故云斷足曰則

奔衛注共叔段之孫定諡也音義

父音甫王音如字共音恭

三年

而復之曰不可使共叔無後於鄭使以十月入曰良



月也就盈數焉注數滿於十疏

注正義曰易繫辭云天一地二天三地四

天五地六天七地八天九地十至十而止是數滿於十也閏元年傳曰萬盈數也數至十則小盈至萬則大盈傳具載定叔事者服虔云定叔之祖共叔段有伐君之罪宜世不長而云不可使共叔無後於鄭言其刑之偏頗鄭厲公以孽篡適同惡相恤故君子謂黨於共叔欲令其後不絕傳所以惡厲公也君子謂

強鉏不能衛其足注言其不能早辟害○冬同盟于

幽鄭成也○王使虢公命曲沃伯以一軍為晉侯注

曲沃武公遂并晉國僖王因就命為晉侯小國故一

軍音義

并如字王必政反

疏

注正義曰桓八年傳稱曲沃武公滅翼其年冬王命虢仲立晉

哀侯之弟緡于晉至是乃并之也晉世家云曲沃武公伐晉侯緡滅之盡以其寶器賂獻於周僖王僖王命曲沃武公為晉君列為諸侯於是盡并晉地而有之曲沃武公已即位三十七年矣自桓叔始封曲沃以至武公滅晉凡六十七歲而卒代晉為諸侯是僖王命之事也周禮小國一軍晉土地雖大以初并晉國故以小國初晉武公伐夷執夷詭諸注夷詭諸周之禮命之

大夫夷采地名音義

詭九委反采七代反後放此

為國請而免之

注為國周大夫音義

為于委反

既而弗報注詭諸不報施

於為國音義

施始政反

故子國作亂謂晉人曰與我伐夷

而取其地注使晉取夷地遂以晉師伐夷殺夷詭諸

周公忌父出奔號注周公忌父王卿士辟子國之難

音義

難乃旦反

惠王立而復之注魯桓十五年經書桓王

崩魯莊三年經書葬桓王自此以來周有莊王又有

僖王崩葬皆不見於經傳王室微弱不能復自通於

諸侯故傳因周公忌父之事而見惠王惠王立在此

年之末音義

不見賢遍反下疏注正義曰史記十二同復自扶又反諸侯年表云莊王元

年當魯桓十六年卽位十五年而崩僖王元年當魯

莊十三年卽位五年而崩惠王元年當魯莊十八年

卽位在十八年而此年傳說惠王之立者杜云傳因

周公忌父之事而見惠王立在此年之末是杜以周

公忌父此年出奔至惠王  
立而得復與史記不違

經十有七年春齊人執鄭詹注齊桓始伯鄭既伐宋又

不朝齊詹為鄭執政大臣詣齊見執不稱行人罪之也

行人例在襄十一年諸執大夫皆稱人以執之大夫賤

故音義詹之廉反始伯音霸疏注正義曰僖七年傳曰

又詹最貴也且傳稱鄭不朝也以君不朝而詹被

言詹是詹最貴也且傳稱鄭不朝也以君不朝而詹被

執明詹是執政大臣為不道君使朝故執之也若詹不

至齊則無由被執知是詣齊見執蓋聘齊也昭八年楚

人執陳行人于徵師殺之傳曰罪不在行人也無罪乃

稱行人知不稱行人罪之也襄十一年楚人執鄭行人

良霄傳曰書曰行人言使人也言使人者言非使人之

罪也書曰者是仲尼新意故指以為例也執諸侯有稱人稱侯之異執大夫者悉皆稱人以執之為大夫賤故也劉炫以此注云詣齊見執釋例曰詹本非出使謂二者自相矛盾今知非者齊以鄭不朝而責於鄭鄭令詹詣齊謝罪齊人執之故釋例曰元非出聘之使集解云詣齊被執二文雖異事實同耳劉炫不尋此意乃為規也過非也

夏齊人殲于遂注殲盡也齊人戍遂翫而無備遂人討

而盡殺之故時史因以自盡為文音義殲子庶反翫五

反疏注正義曰殲盡也釋詁文舍人曰殲衆之盡也時

史惡其輕敵而以自盡為文罪齊戍也釋例曰齊

人殲于遂鄭棄其師亦時史即事以安文或從赴辭故傳亦不顯明義例也

秋鄭詹自齊逃來注無傳詹不能伏節守死以解國患

而遁逃苟免書逃以賤之音義

遁徒疏注正義曰伏節守死以解國患

當如昭元年叔孫豹之居位待罪也逃若匹夫逃竄故云書逃以賤之鄭詹自齊逃來過魯而後歸鄭故書之

冬多麋注無傳麋多則害五稼故以災書音義

麋亡悲反疏

注正義曰麋是澤獸魯所常有是年暴多多則害五稼故言多以書災也

傳十七年春齊人執鄭詹鄭不朝也○夏遂因氏領

氏工婁氏須遂氏饗齊戍醉而殺之齊人殲焉注饗

酒食也四族遂之彊宗齊滅遂戍之在十三年音義

頡烏納反又苦荅反  
婁力侯反饗本作享

經十有八年春王三月日有食之注無傳不書日官失

之疏

注正義曰經亦無朔字當云  
不書朔與日注不言朔脫也

夏公追戎于濟西注戎來侵魯公逐之於濟水之西

秋有葷注葷短弧也蓋以含沙射人為災音義

葷本又作域音

或短弧也本草謂之射工短弧本又作斷

疏注正義曰穀梁傳曰

同丁管反弧又作弧音胡射人食亦反  
葷射人者也洪範五行傳曰葷如蠶三足生於南越南  
越婦人多淫故其地多葷淫女惑亂之氣所生也陸璣  
毛詩義疏云葷短弧也一名射景如蠶三足在江淮水  
中人在岸上景見水中投人景則殺之故曰射景或謂

舍沙射人入皮肌其創如疥服虔云徧身獲獲或或故  
為災沈氏云此有蠃傳重發例者以螟螣與蜚同是害  
禾稼此蠃則害  
人故傳特發之

冬十月

傳十八年春虢公晉侯朝王王饗醴命之宥注王之

覲羣后始則行饗禮先置醴酒示不忘古飲宴則命

以幣物宥助也所以助歡敬之意言備設音義禮音

音疏注正義曰王饗醴命之宥者王為之設饗禮置  
又醴酒命之以幣物所以助歡也宥助釋詁文周

禮掌客王待諸侯之禮上公三饗三食三燕侯伯二  
饗再食再燕子男壹饗壹食壹燕三禮先言饗是王



之覲羣后始則行饗禮也酒正辨五齊之名一曰泛齊二曰醴齊三曰盎齊四曰緹齊五曰沈齊鄭註云泛者成而滓浮泛泛然醴猶醴也成而汁滓相將如今恬酒矣盎猶翁也成而翁翁然蔥白色緹者成而紅赤沈者成而滓沈如今造清矣自醴以上尤濁然則以其尤濁故先置之示不忘古也知者禮運云燔黍捭豚下即云以燔以炙以為醴酪是醴酒在先而有故曰先置醴酒示不忘古也詩序曰鹿鳴燕羣臣嘉賓也既飲食之又實幣帛筐篚以將其厚意聘禮云若不親食使大夫朝服致之以侑幣致饗以酬幣亦如之是饗禮有酬幣也禮主人酌酒於賓曰獻賓荅主人曰酢主人又酌以酬賓曰酬幣蓋於酬酒之時賜之幣也所賜之物即下玉馬是也傳稱饗醴命宥言其備設盛禮也此注命之宥者命在下以幣物宥助僖二十八年命晉侯助以束帛以將厚意皆命不同者以彼有命晉侯之事故也皆賜玉

五穀馬三匹非禮也注雙玉為穀音義

穀音角字又作珏疏

注正義曰倉頡篇穀作珏雙玉為穀故字從兩玉

王命諸侯名位不同禮亦

異數不以禮假人注侯而與公同賜是借人禮音義

借子疏

注正義曰號君不知何爵稱公謂為三公也

夜反疏

周禮王之三公八命侯伯七命是其名位不

同也其禮各以命數為節是禮亦異數也今侯而與

公同賜是借人禮也假借同義取者假為上聲借為

入聲與者假借皆為去聲○號公晉侯鄭伯使原莊公逆王后于

陳陳媯歸于京師注號晉朝王鄭伯又以齊執其卿

故求王為援皆在周倡義為王定昏陳人敬從得同

姓宗國之禮故傳詳其事不書不告音義

為王于實  
偽反

惠后注陳媯後號惠后寵愛少子亂周室事在僖二十四年故傳於此並正其后稱○夏公追戎于濟西不言其來諱之也注戎來侵魯魯人不知去乃追之

故諱不言其來疏

注正義曰傳例有鐘鼓曰伐無曰  
侵戎之來也魯人不知宜無鐘鼓

故以侵言之釋例曰戎之入魯魯人不知去而遠追  
又無其獲邊竟不備候不在疆所以為諱諱此君之  
闕亦所以示戒○秋有戡為災也○初楚武王克權  
將來之君也

使鬬緡尹之注權國名南郡當陽縣東南有權城鬬

緡楚大夫音義

緡亡疏正義曰尹訓正也楚官多以中反尹為名此滅權為邑使緡為

長故曰

尹也

以叛圍而殺之注緡以權叛音義

以叛絕句本或作畔

俗字也

遷權於那處注那處楚地南郡編縣東南有那

口城音義

那處那又作那同乃多反下昌呂反又昌慮反編必綿反一音步典反

使閭

教尹之注閭教楚大夫及文王卽位與巴人伐申而

驚其師注驚巴師巴人叛楚而伐那處取之遂門于

楚注攻楚城門閭教游涌而逸注涌水在南郡華容

縣閭教既不能守城又游涌水而走音義

涌音湧水名

楚

子殺之其族為亂冬巴人因之以伐楚

經十有九年春王正月

夏四月

秋公子結媵陳人之婦于鄆遂及齊侯宋公盟注無傳  
公子結魯大夫公羊穀梁皆以為魯女媵陳侯之婦其  
稱陳人之婦未入國略言也大夫出竟有可以安社稷  
利國家者則專之可也結在鄆聞齊宋有會權事之宜  
去其本職遂與二君為盟故備書之本非魯公意而又

失媵陳之好故冬各來伐音義

媵以證反又繩證反送也竟音境好呼報反

疏

注正義曰公羊傳曰媵者何諸侯娶一國則二國往媵之媵不書此何以書為其有遂事書大夫無遂事

此其言遂何聘禮大夫受命不受辭出竟有可以安社稷利國家者則專之可也穀梁文雖不明其意亦為魯女左氏無傳取彼為說故云公羊穀梁皆以為魯女媵陳侯之婦穀梁傳曰其曰陳人之婦略之也以未入國略而不言陳侯夫人成九年伯姬歸于宋晉衛齊三國來媵然則為人媵者皆送至嫁女之國使之從適而行此鄭是衛之東地蓋陳取衛女為婦魯使公子結送媵向衛至鄭聞齊宋為會將謀伐魯故權事之宜去其本職不復送女至衛遂與二君會盟故備書之也送女至鄭停女會盟鄭是盟處故言于鄭非本期送女使至鄭也既盟之後遂不復送女其盟本非公意又失媵陳之好故至冬而三國來伐結之此盟於魯無益故無嘉善

之文文八年冬十月壬午公子遂會晉趙盾盟于衡雍  
乙酉公子遂會維戎盟于暴四日之間不容反報亦是  
專命而盟患難俱解故再稱名氏珍而貴之與此異也  
宣十二年宋華椒承羣偽之言以誤其國宋人被伐而  
貶華椒今三國伐魯不貶公子結者結之為  
盟本欲安社稷利國家與華椒事異故不貶

夫人姜氏如莒注無傳非父母國而往書姦疏

注正義曰此既

無傳不知何為如莒婦人  
不以禮出為姦故曰書姦

冬齊人宋人陳人伐我西鄙注無傳幽之盟魯使微者  
會鄆之盟又使媵臣行所以受敵鄙邊邑

傳十九年春楚子禦之大敗於津注禦巴人為巴人

所敗津楚地或曰江陵縣有津鄉還鬻拳弗納遂伐

黃注鬻拳楚大閹黃羸姓國今弋陽縣音義

鬻音育拳求圓

反閹音昏守門人也

疏注正義曰黃羸姓國世本文

敗黃師于蹇

陵注蹇陵黃地音義

蹇在亦反一音七略反

還及湫有疾注南

郡郿縣東南有湫城音義

湫子小反郿音若

夏六月庚申卒

鬻拳葬諸夕室注夕室地名音義

夕朝夕之夕

亦自殺也

而葬於經皇注經皇冢前闕生守門故死不失職音

義

經田結反疏注正義曰鬻拳自殺以殉當是近墓經皇闕也之地宣十四年傳稱楚子聞宋殺申



舟投袂而起屨及於室皇劍及於寢門之外則室皇  
近於門外當是寢門闕也知此經皇亦是冢前闕也  
且此人生為大閹職掌守門明此亦是守門示死  
不失職也餘書無經皇之名蓋唯楚有此號也初

鬻拳強諫楚子楚子弗從臨之以兵懼而從之鬻拳

曰吾懼君以兵罪莫大焉遂自刖也楚人以為大閹

謂之大伯注若今城門校尉官音義

強其丈反大伯音泰校戶教反

字從疏正義曰周禮天官閹人掌守王宮之中門之

木

疏

正義曰周禮天官閹人掌守王宮之中門之木禁鄭玄云閹人司昏晨以啟閉者刑人墨者

使守門秋官掌戮墨者使守門刖者使守圜則閹不  
使刖而鬻拳得為閹者周禮地官之屬有司門下大  
夫二人掌授管鍵以啟閉國門鄭玄云若今城門校  
尉主王城十二門此注亦云若今城門校尉官然則

鬻拳本是大臣楚人以其賢而使典此職非為刑而役之其為大閹者當如地官之司門非天官之閹人亦主晨昏開閉通以閹為名焉謂之大伯伯長也為門官之長也使其後掌之注使

其子孫常主此官君子曰鬻拳可謂愛君矣諫以自納於刑刑猶不忘納君於善注言愛君明非臣法也

楚能盡其忠愛所以興疏

注正義曰何休膏肓云人臣諫君非有死亡之急而

以兵臨君開篋弑之路左氏以為愛君於義左氏為短故注言此以釋何休之難

○初王姚

嬖于莊王生子穰注王姚莊王之妾也姚姓也音義

姚羊消反嬖必計反頽徒回反

子穰有寵為國為之師及惠王即位

注周惠王莊王孫取為國之圃以為圃注圃園也圃

苑也音義

圃必古反又音布圃音疏注正義曰冢宰又徐于懋反苑於阮反職云園圃毓草

木鄭玄云樹果菰曰圃圃其樊也詩云折柳樊圃成

十八年築鹿園然則圃以蕃為之所以樹果菰園則

築牆為之所以養禽獸

二者相類故取圃為園

邊伯之宮近於王宮王取之

注邊伯周大夫音義

近附近

王奪子禽祝跪與詹父

田注三子周大夫音義

跪求委反

而收膳夫之秩注膳夫

石速也秩祿也音義

收式周反

故為國邊伯石速詹父子

禽祝跪作亂因蘇氏注蘇氏周大夫桓王奪其十二

邑以與鄭自此以來遂不和○秋五大夫奉子積以  
伐王注石速士也故不在五大夫數不克出奔溫注  
溫蘇氏邑蘇子奉子積以奔衛衛師燕師伐周注燕  
南燕○冬立子積

經二十年春王二月夫人姜氏如莒注無傳

夏齊大災注無傳來告以大故書天火曰災例在宣十

六年疏

注正義曰襄九年三十年宋災昭九年陳災十  
八年宋衛陳鄭災皆不言大知此來告以大故

書大也

秋七月

冬齊人伐戎注無傳

傳二十年春鄭伯和王室不克注克能也執燕仲父

注燕仲父南燕伯為伐周故音義

為伐于偽疏注正反下文同義曰

譜亦云南燕伯爵不知所出服虔亦云南燕伯爵

夏鄭伯遂以王歸王處于

櫟秋王及鄭伯入于鄆注鄆王所取鄭邑音義

鄆鳥苦反

遂入成周取其寶器而還冬王子穧享五大夫樂及

徧舞注皆舞六代之樂音義

徧音

疏

注正義曰言樂及徧舞則樂之

所有舞悉周徧故知皆舞六代之樂也周禮大司樂以樂舞教國子舞雲門大卷大咸大磬大夏大濩大武鄭玄云此周所存六代之樂也傳記所說雲門大卷黃帝也大咸堯也大韶舜也大夏禹也大濩湯也大武周武王也是為六代奏黃鐘歌大呂舞雲門以祀天神奏大簇歌應鐘舞咸池以祭地示奏姑洗歌南呂舞大磬以祀四望奏蕤賓歌林鐘舞大夏以祭山川奏夷則歌中呂舞大濩以享先妣奏無射歌夾鐘舞大武

以享先祖

鄭伯聞之見虢叔注叔虢公字曰寡人聞

之哀樂失時殃咎必至今王子猷歌舞不倦樂禍也

夫司寇行戮注司寇刑官音義

樂音洛殃咎上於君良反下巨九反

為之不舉注去盛饌音義

去起呂反疏注正義曰周饌仕眷反禮膳夫職曰

王曰一舉鼎十有二物皆有俎以樂侑食大喪則不舉大荒則不舉大札則不舉天有災則不舉邦有大故則不舉鄭玄云殺牲盛饌曰舉襄二十六年傳曰古之治民者將刑為之不舉不舉則徹樂是不舉者貶膳食而況敢樂禍乎奸王之位禍孰大焉臨禍徹聲樂也忘憂憂必及之盍納王乎虢公曰寡人之願也音義

奸音干盍胡獵反何不也

經二十有一年春王正月

夏五月辛酉鄭伯突卒注十六年與魯大夫盟于幽

秋七月戊戌夫人姜氏薨注無傳薨寢祔姑赴於諸侯

故具小君禮書之音義

附音

疏注正義曰經無所闕禮

先儒之說使莊公絕母子之親故於此明之知母子不絕下葬注亦然

冬十有二月葬鄭厲公注無傳八月葬緩慢也

傳二十一年春胥命于弭夏同伐王城注鄭虢相命

弭鄭地音義

弭面爾反

鄭伯將王自圉門入虢叔自北門

入殺王子績及五大夫鄭伯享王于闕西辟樂備注

闕象魏也樂備備六代之樂音義

闕魚呂反疏注正義曰

定二年雉門及兩觀災注云兩觀闕也禮運云昔者仲尼與於蜡賓事畢出遊於觀之上鄭玄云觀闕也



釋宮云觀謂之闕郭璞云宮門雙闕周禮大宰正月之吉縣治象之法于象魏使萬民觀治象鄭衆云象魏闕也哀三年魯災傳稱季桓子御公立于象魏之外命藏象魏曰舊章不可亡也由此言之則觀闕象魏其事一也劉熙釋名云闕在門兩旁中央闕然為道也然則其上縣法象其狀巍巍然高大謂之象魏使人觀之謂之觀也闕西辟者辟是旁側之語也王服虔云西辟西偏也當謂兩觀之內道之西也王

與之武公之略自虎牢以東注略界也鄭武公傳平

王平王賜之自虎牢以東後失其地故惠王今復與

之虎牢河南成臯縣音義

復扶疏注正義曰孟子云又反疏仁政必自經界始

昭七年傳曰天子經略諸侯正封封略之內何非君土孟子經界即傳之經略且云封略之內封是竟則

知略是界也武公東鄭之始封君也言武公之略則是武公舊竟若其由來不失不須今日復與故知後失其地惠王今復與之隱十一年王取鄆劉為邾之田于鄭蓋桓王之世失之也

原伯曰鄭

伯效尤其亦將有咎注原伯原莊公也言效子顏舞

徧樂音義

效戶教反徧音遍

五月鄭厲公卒王巡號守注巡

守於號國也天子省方謂之巡守音義

守音狩本或作狩後放此

注疏注正義曰孟子云諸侯朝天子曰述職天子適同諸侯曰巡守守者守也言諸侯為天子守土天子時巡行之易稱后不省方故云天子省方謂之巡守

號公為王宮于玆注玆

號地音義

玆蒲項反

王與之酒泉注酒泉周邑鄭伯之享

王也王以后之鞶鑑予之注后王后也鞶帶而以鑑

為飾也今西方羗胡猶然古之遺服音義

鞶步干反又蒲官反

紳帶也鑑工

疏注正義曰

鞶是帶也鑑是鏡也此與

暫反鏡也

疏

定六年傳皆鞶鑑雙言則鞶鑑一物

故知以鏡飾帶舉今

號公請器王予之爵注爵飲酒

羗胡之服以明之

器鄭伯由是始惡於王注為僖二十四年鄭執王使

張本音義

惡烏路反又如字使所吏反

疏正義曰鄭伯謂厲公子

文公也服虔云鞶鑑王

后婦人之物非所以賜有功爵飲酒器王爵也一升曰爵爵人之所貴者言鄭伯以其父得賜不如號公為是始惡於王積而成怨僖二十四年遂執王使此為彼張本○冬王歸自號注傳

言王之偏也

經二十有二年春王正月肆大眚注無傳赦有罪也易  
稱赦過宥罪書稱眚災肆赦傳稱肆眚圉鄭皆放赦罪  
人盪滌衆故以新其心有時而用之非制所常故書音

義眚所景反盪音蕩  
又作蕩滌徒歷反疏注正義曰肆大眚者肆緩也眚  
罪猶赦則小罪亦赦之猶今赦書大辟罪以下悉皆原  
免也易解卦象云雷雨作解君子以赦過宥罪解卦坎  
下震上震為雷坎為雨雷動雨下而萬物解散故君子  
以此卦象而放赦有過寬宥罪人也書稱眚災肆赦舜  
典文孔安國云眚過災害肆緩也過而有害當緩赦之  
肆眚圉鄭襄九年傳文也此諸言肆眚者皆是放赦罪

人蕩滌衆故除其瑕穢以新其心也必其國有大患非赦不解或上有嘉慶須布大恩如是乃行此事故釋例曰天有四時得以成歲雷霆以振之霜雪以齊之春陽以煖之雲雨以潤之然後能相育也天且弗違而況於人乎物不可終否故受之以同人同人者與人同也解天下之至結成天下之疊疊肆大眚之謂也堯曰咨爾舜有罪不敢赦所以須待革命有時而用之非制所常故書之也杜唯言有時用之亦不知此時何以須赦穀梁傳曰肆大眚為嫌天子之葬也其意言文姜有罪不合以禮而葬若不赦不復書葬嫌天子許之明須赦而後得葬故為赦也賈逵以文姜為有罪故赦而後葬以說臣子也魯大赦國中罪過欲令文姜之過因是得除以葬文姜杜不明說要文姜出奔之日尚稱夫人夫人之名未嘗有賤何須以赦除之此赦必不為文姜但夫人以去年七月薨十一月則當合葬乃至此年正月經七月始葬如此遲緩必是國家有事須赦解之但不知

其所  
由耳

癸丑葬我小君文姜注無傳反哭成喪故稱小君

陳人殺其公子御寇注宣公大子也陳人惡其殺大子

之名故不稱君父以國討公子告音義

御音禦本亦作禦惡烏路反

疏注正義曰傳言大子必是大子也僖五年晉侯殺其

世子申生稱君稱世子此不然者釋例曰古者討殺

其大夫各以罪狀宣告諸侯所以懲不義重刑戮也晉

侯使以殺大子申生之故來告衛殺孔達傳載其辭辭

雖有臨時之狀其告則常也然則殺大夫公子當以罪

狀告人此傳不說御寇之罪則陳人不以罪告而經書

公子是惡殺大子之名故  
不稱君父以國討公子告

夏五月疏

正義曰釋例曰年之四時雖或無事必空書首月以紀時變以明厯數莊公獨稱夏五月

及經四時有不具者丘明無文皆闕繆也

秋七月丙申及齊高傒盟于防注無傳高傒齊之貴卿而與魯之微者盟齊桓謙接諸侯以崇霸業

冬公如齊納幣注無傳公不使卿而親納幣非禮也母

喪未再期而圖昏二傳不見所譏左氏又無傳失禮明

故音義

見賢遍反又如字

疏

注正義曰釋例曰宋公使華元來聘聘不應使卿故傳但言聘共姬

也使公孫壽來納幣應使卿故傳明言其得禮也是納幣當使卿公不使卿親納幣非禮也

傳二十二年春陳人殺其大子御寇注傳稱大子以

實言陳公子完與顓孫奔齊注公子完顓孫皆御寇

之黨音義

顓音專

顓孫自齊來奔注不書非卿齊侯使

敬仲爲卿注敬仲陳公子完辭曰羈旅之臣注羈寄

也旅客也幸若獲宥及於寬政注宥赦也赦其不開

於教訓而免於罪戾弛於負擔注弛去離也音義

失弛

氏反擔丁暫反離力智反

君之惠也所獲多矣敢辱高位以速官

謗注敢不敢也音義

謗布浪反

請以死告注以死自誓詩



云翹翹車乘招我以弓豈不欲往畏我友朋注逸詩

也翹翹遠貌古者聘士以弓言雖貪顯命懼為朋友

所譏責音義

翹祁克反  
東繩證反

使為工正注掌百工之官飲

桓公酒樂注齊桓賢之故就其家會據主人之辭故

言飲桓公酒音義

飲於鳩反注同疏注正義曰春秋  
樂音洛下注同

召君者皆大臣擅寵如衛公叔文子宋桓魋之徒始  
為之耳為之非禮法也敬仲羈旅之臣且知禮者也  
必不召公臨已知是桓公賢之自就其家  
會也據敬仲為主人辭故言飲公酒耳公曰以火

繼之辭曰臣卜其晝未卜其夜不敢疏

正義曰服虔  
云臣將享君

必卜之示戒慎也此桓公自就其家非敬仲發心請  
享不得言將享必卜也蓋桓公告其往日乃卜之耳  
言未卜其夜者詩云厭厭夜飲在宗載考鄭玄云考  
成也夜飲之禮在宗室同姓則成於庶姓讓之則止  
引此敬仲之事云此之謂不成君子曰酒以成禮不  
是言敬仲非齊同姓故不敢也

繼以淫義也注夜飲為淫樂以君成禮弗納於淫仁

也初懿氏卜妻敬仲注懿氏陳大夫龜曰卜音義

妻

計疏注正義曰曲禮文也周禮大卜掌三兆之法一

反疏曰玉兆二曰瓦兆三曰原兆其經兆之體皆百

有二十其頌皆千有二百鄭玄云兆者灼龜發於火  
其形可占者其象似玉瓦原之疊罇是用名之焉原  
原田也頌謂繇也每體十繇然則卜人所占之語古  
人謂之為繇其辭視兆而作出於臨時之占或是舊

辭或是新造猶如筮者引周易或別造辭卜之繇辭  
未必皆在其頌千有二百之中也此傳鳳凰于飛下  
盡莫之與京裏十年傳稱衛卜禦寇姜氏問繇曰兆  
如山陵有夫出征而喪其雄哀九年傳稱晉趙鞅卜  
救鄭遇水適火史龜曰是謂沈陽可以興兵利以伐  
姜不利子商三者皆是繇辭其辭並韻則繇辭法當  
韻也郭璞撰自所卜事謂之  
辭林其辭皆韻習於古也  
其妻占之曰吉注懿氏

妻是謂鳳凰于飛和鳴鏘鏘注雄曰鳳雌曰凰雄雌  
俱飛相和而鳴鏘鏘然猶敬仲夫妻相隨適齊有聲

譽音義

和如字又戶臥反注同疏注正義曰釋鳥云鏘七羊反本又作將將

云瑞應鳥說文云鳳神鳥也天老曰鳳之象也鴻前  
廖後蛇頸魚尾鸛頸鴛思龍文龜背燕頤鷄喙五色

備舉出於東方君子之國翱翔四海之外過崑崙飲砥柱濯羽弱水莫宿丹穴見則天下大安寧從鳥凡聲鳳飛則羣鳥從之以萬數故古文鳳作朋字山海經云丹穴之山有鳥焉其狀如鶴五采而文名曰鳳皇首文曰德翼文曰順背文曰義膺文曰仁腹文曰信是鳥也飲食則自歌自舞是說鳳皇之狀也鳳皇雄雌俱飛喻敬仲夫妻相隨鏘鏘鳴之聲故以喻有聲譽也

有媯之後將育于姜

注媯陳姓姜齊姓五世其昌並于正卿八世之後莫

之與京注京大也音義

並于本或疏正義曰五世其作並為誤昌言其始昌盛

也並于正卿位與卿並得為上大夫也莫之與京謂無與之比大言其位最高也五世八世當是卜兆之間有其象傳言其占之辭不言陳厲公蔡出也注姊其知之意固非後學所得詳之

妹之子曰出疏

注正義曰釋親云男子謂姊妹之子為出言姊妹出嫁而生子也

故

蔡人殺五父而立之

注五父陳佗也殺陳佗在桓六年

年音義

佗大反

生敬仲其少也周史有以周易見陳侯

者注周大史也音義

少詩照反見如字疏注正義曰又賢遍反大音泰直言周史

知是大史者周禮大史掌書昭二年傳稱韓宣子觀書於大史氏此以周易見陳侯故知是大史也以周

易見者自以知周易見陳侯言已明易能筮故陳侯使之筮也

陳侯使筮之注著曰

筮音義

筮上制反著音尸

疏注正義曰曲禮文也其揲著求卦之法則易繫辭具焉

遇

觀

䷓

注坤下巽上觀音義

觀古亂反注同

之否

䷋

注坤

下乾上否觀六四爻變而為否音義

否備矣疏正義反注同曰此

注坤下巽上觀坤下乾上否及六四爻變諸如此革皆據周易之文知之劉炫規過云觀之否者為觀卦之否爻屯之比者屯卦之比爻皆不取後卦之義今刪定以為不然何者以閔元年畢萬筮仕遇屯之比云屯固比入僖十五年晉獻公筮嫁伯姬得歸妹之睽云士刳羊亦無益歸妹上六爻辭又云歸妹睽孤寇張之孤睽之上九爻辭又云歸妹之睽猶無相也昭五年明夷之謙云明夷于飛垂其翼又云謙不足飛不翔此之等類皆取前後二卦以占吉凶今人之筮亦皆如此故賈服及杜並皆同焉劉炫苟異前儒好為別見以規杜氏非也沈云遇者不期而會之名筮者所得卦之吉凶非有宿契逢遇而已故謂之遇劉炫云下體坤坤為地為眾上體巽巽為風為木互體有艮艮為門闕地上有木而為門闕宮室之象宮

室而可風化使天下之衆觀焉故謂之觀也下體坤  
坤為地上體乾乾為天天不下降地不上騰天地不  
通其氣上下否曰是謂觀國之光利用賓于王注此  
塞故謂之否也

周易觀卦六四爻辭易之為書六爻皆有變象又有

互體聖人隨其義而論之音義

爻戶交反

此其代陳有國

乎不在此其在異國非此其身在其子孫疏

正義曰觀國之

光利用賓于王二句周易文也此先云不在此其在  
異國後云非此其身在其子孫所以在下覆結先云  
其在後乎後云在異國者其在異國之下更欲演說  
異國是大嶽姜姓其言稍多且須以結末故進其在  
後乎於上先解之也庭實旅百以下方解利用賓于  
王則上句故曰觀國之下未須賓王之句而再言利

用賓于王者蓋以觀國之光即是朝王之事直言觀光於文不足故連言賓王但未解賓王之義故於下更重解之傳稱引詩斷章則引易論事亦未必如本此言觀國之光謂所為筮者觀他人有國之光榮也此有國之人利用為賓客于王朝也其意言見其子孫有國作賓于王家耳非其身也代陳有國言代陳正適子孫有其國家陳滅此興是代之也注正義曰易之為書揲著求爻重爻為卦爻有七八九六其七八者六爻並皆不變卦下揲為之辭名之曰彖彖者才也揲論一卦之才德若乾元亨利貞之類皆是也其九六者當爻有變每爻別為其辭名之曰象象者像也指言一爻所像若乾初九潛龍勿用之類皆是也不變者聚而為彖其變者散而為象計每於一卦當畫兩體但以此爻陰陽既同唯變否有異且每爻異辭不可爻作二畫從上可知故不畫二也傳之筮者指取易義不為論卦丘明不畫卦也諸為注者皆



言上體下體若其畫卦示人則當不煩此注注亦不  
畫卦也今書有畫卦者當是後之學者自恐不識私  
畫以備忘遂傳之耳每爻各有象辭是六爻皆有變  
象二至四三至五兩體交互各成一卦先儒謂之互  
體聖人隨其義而論之或取互體言其取義無常也  
光遠而自他有耀者也疏  
正義曰易稱觀國之光故解其光義言光在此處遠  
照於他物從他物之上而有明耀者也謂光能遠照  
於他物有明故下云坤土也巽風也乾天也風為天  
照之以天光是也

於土上山也注巽變為乾故曰風為天自三至四有

艮象艮為山音義

乾其疏正義曰六四之爻位在坤  
然反上坤為土地山是地之高

者居於土上是為土上山也又巽變為乾六四變為  
九四從二至四互體有艮之象艮為山故言山也

有山之材而照之以天光於是乎居土上注山則材之所生上有乾下有坤故言居土上照之以天光故曰觀國之光利用賓于王注四為諸侯變而之乾有國朝王之象疏正義曰山則材之所生此人有山之材言其必大富也上天以明臨下照之以天光言天子臨照之也於是乎又居於土上既富矣而被天照又復居有土地是為國君之象也易位四為諸侯變而為乾乾為天子是有國朝王之象故曰觀國之光利用賓于王

庭實旅百

奉之以玉帛天地之美具焉故曰利用賓于王注艮為門庭乾為金玉坤為布帛諸侯朝王陳摯幣之象

旅陳也百言物備音義

又作贊同疏正義曰覲禮侯

受圭禮成乃出又入行享禮獻國之所有此說行享禮也旅陳也庭之所實陳有百品言物備也奉之以玉帛謂執玉帛而致享禮被天之照有地之材天子賜之土田國君獻國所有天地之美備具焉朝王之儀畢足矣故曰利用賓于王注正義曰易說卦艮為門闕乾為金玉坤為布帛杜以門內有庭傳言庭實故改言艮為門庭耳杜言諸侯朝王陳贊幣之象者謂陳之以行享禮也覲禮侯氏既見王乃云四享皆束帛加璧庭實唯國所有鄭玄云四當為三大行人職曰諸侯廟中將幣皆三享其禮差又無取於四也初享或用馬或用虎豹之皮其次享三牲魚腊邊豆之實龜也金也丹漆絲纁竹箭也其餘無常貨此物非一國所能有唯國所有分為三享皆以璧帛致之禮器云大饗其王事與三牲魚腊四海九州之美味

也遷豆之薦四時之和氣也內金示和也東帛加璧尊德也龜為前列先知也金次之見情也丹漆絲纊竹箭與衆共財也其餘無常貨各以其國之所有則致遠物也郊特牲曰旅幣無方所以別土地之宜而節遠邇之期也龜為前列先知也以鍾次之以和居參之也虎豹之皮示服猛也束帛加璧往德也鄭玄觀禮之注所言出於彼也杜言贄幣即鄭所謂璧帛也此奉之以玉帛執以致庭實耳其玉帛不入王也觀禮侯氏致享執玉致命王撫之而已不受之也又曰侯氏降授宰幣是庭實之幣皆庭受之唯馬受之於門外耳旅陳釋詁文猶有觀焉故曰其在後乎注也百者言其物備也

因觀文以博占故言猶有觀非在已之言故知在子

孫音義

觀古疏注正義曰以卦名觀故因觀文以博亂反疏占也觀者視他之辭此賓王之事若

所為筮者身自當有則不應觀他此卦猶有觀焉風觀非在已之言其人觀他有之故知在其子孫也

行而著於土音義

著直略反又職畧反或作着非

疏正義曰服虔云

著土也一曰巽為風復為木風吹木實落去更生他土而長育是為在異國

故曰其在異

國乎若在異國必姜姓也姜大嶽之後也注姜姓之

先為堯四嶽疏

注正義曰周語稱堯命禹治水共之從孫四嶽佐之

昨四嶽國命為侯伯

賜姓曰姜氏曰有呂賈達云共共工也從孫同姓末嗣之孫四岳官名大岳也者主四岳之祭焉然則以其主嶽之祀尊之故稱大也

山嶽則配天物莫能兩大陳哀此其

昌乎注變而象艮故知當興於大嶽之後得大嶽之

權則有配天之大功故知陳必哀疏

注正義曰六四爻變為九四與

二共為艮象艮為山故知興於山嶽之國姜姓大岳之後知其將育于姜地之高者莫過於山詩云崧高

維嶽駿極于天言其大能至天故山嶽則配天也且乾在上艮在下亦是山嶽配天之象此人子孫養於

大嶽之後官尊位貴得大嶽之權則其功德有配天之天然天子其功配天今縱得大嶽之權唯諸侯耳

言配天者以其功大故甚言之物莫能兩大此有興兆故名陳必哀也

及陳之初亡也

注昭八年楚滅陳陳桓子始大於齊注桓子敬仲五

世孫陳無宇疏

注正義曰史記田完世家完卒諡為敬仲仲生穉孟夷夷生湣孟莊莊生

文子須無文子生桓子無宇是為敬仲五世孫也

其後亡也注哀十七年楚

復滅陳音義

又復扶反

成子得政注成子陳常也敬仲八

世孫陳完有禮於齊子孫世不忘德德協於卜故傳

備言其終始卜筮者聖人所以定猶豫決疑似因生

義教者也尚書洪範通龜筮以同卿士之數南蒯卜

亂而遇元吉惠伯答以忠信則可臧會卜僭遂獲其

應丘明故舉諸縣驗於行事者以示來世而君子志

其善者遠者他皆放此音義

豫音預本亦作預蒯苦注反僭子念反應應對

之應縣

疏注正義曰沈氏云世家桓子生武子啟及

音玄

僖子乞乞卒子常代之是為田成子是於

敬仲為七世言八世者據其相代在位為八世也成  
子弑簡公專齊政是莫之與大也成子生襄子罍罍  
生莊子白白立大公和和遷齊康公於海上和立為  
齊侯和孫威王稱王四世而秦滅之作傳之時完之  
子孫已盛故傳備言其終始也世家云敬仲之如齊  
以陳字為田氏左傳終始稱陳田必非敬仲所改未  
知何時改耳左傳之初至此始有卜筮故杜於此通  
說之曲禮曰卜筮者先聖王之所以使民決嫌疑定  
猶與也是先王立之本意也因而生義教謂教人以  
行義行善則德協於卜行惡則遇吉反凶必以行義  
乃可卜也洪範曰汝則有大疑謀及乃心謀及卿士  
謀及庶人謀及卜筮謀及卿士而以卜筮同之是通  
龜筮以同卿士之數也南蒯卜為亂不信則不可臧  
會卜為僭不信乃遂吉二事相反故特引之言卜筮  
應人行也南蒯在昭十二年臧會在昭二十五年南  
蒯筮而言卜者卜筮通言耳杜引洪範者欲明龜筮



未必神靈故云以同卿士之數言龜筮所見纔與卿士同耳又引南蒯者明吉凶由行不由卜筮欲使人脩德行不可純信卜筮也又引臧會者吉凶亦由卜筮不可專在於行欲使人敬龜筮也故丘明舉縣驗於行事者以示來世脩德行敬龜筮言驗於行事者南蒯則行驗而龜筮不驗臧會則行不驗而龜筮驗言君子志其善者遠者善者謂勸人脩德行敬龜筮是也遠者謂舉其大綱勸人為善長久遠道非有臨時應驗此遠者即上善者指其事謂之善指其教謂之遠劉炫云計春秋之時卜筮多矣丘明所載唯二十許事舉其縣驗於行事者其不驗者不載之君子之人當記其志之善者知之遠者他皆放此

春秋左傳注疏卷八

春秋左氏傳注疏卷八考證

宋大水注公使弔之故書○呂祖謙曰諸國告則書其顯然為衆所知者亦不待告也春秋之世災異多矣聖人不能盡書特取一二甚者以為世戒

傳覆而敗之曰取某師疏哀九年宋皇瑗取鄭師于雍

丘○臣召南

按經文書取某師惟皇瑗及哀十三年

鄭罕達取宋師于岳二文而已實則隱十年宋人蔡人衛人伐戴鄭伯伐取之亦取某師之類也

宋萬弑其君捷及其大夫仇牧注萬及仇牧皆宋卿仇  
牧稱名不警而遇賊無美事可褒○臣召南按公羊  
謂仇牧不畏強禦穀梁謂仇牧為閑是也卽以左傳  
考之華督為太宰位在牧上亦為萬所殺而經不書  
以督舊為弑君之逆賊故削之牧為忠臣故筆之也  
杜氏之說貶孔父貶仇牧悖理傷教孔疏亦附會之  
信如所云然則孔子春秋成而忠臣義士懼耶不可  
不辨

傳蕭叔大心注叔蕭大夫名○趙汭補注曰叔蕭大夫  
字大心其名也傳兼稱之臣浩按趙氏說足以正杜  
之失

齊侯宋人陳人蔡人邾人會于北杏○孫覺曰桓公將  
興霸業諸侯未甚信而桓公欲過為謙故親屈其尊  
以會諸侯之臣也蘓軾曰齊桓始合諸侯以平宋亂  
自是遂得諸侯故四國皆稱人言衆與之也

單伯會伐宋注單伯周大夫○呂大圭曰單伯周之世

族諸侯大夫無稱伯者如毛伯凡伯召伯皆王朝卿士周有單姓魯無單姓經傳固可考也趙汭曰二傳誤以單伯為魯大夫故元年送王姬改送為逆

傳齊請師于周○陳傅良曰傳見齊初伯稟命天子

傳十五年春復會焉齊始霸也○劉敞權衡曰凡霸者當主諸侯諸侯莫先焉此年秋伐鄭宋序齊上明年夏伐鄭宋亦序齊上齊之未主諸侯明矣然則齊始霸在十六年九國同盟于幽之時也

臣召南

按齊桓

之霸基於北杏而成於鄆之再會傳言始霸甚確劉氏議之非也

宋人齊人衛人伐鄭疏諸侯會許男在曹滑之上○  
浩按此以下文幽之會言當作許男在滑伯之上臣

傳惠王立而復之○趙汭補注曰經書葬桓王後王人救衛王姬歸于齊則莊王也單伯會伐宋會諸侯于鄆命曲沃伯為晉侯則僖王也虢公晉侯鄭伯使原莊公逆王后于陳以後皆惠王事

傳遂因氏領氏○臣進賢

按領從合不從令別本作領

非也

傳實惠后○陳傳良曰為王子帶起傳

傳公追戎于濟西不言其來諱之也○啖助曰書追明  
已去而追直書實事有何諱乎

傳遂伐黃注黃羸姓國今弋陽縣○臣召南按杜注於

地名必具郡縣此惟言縣以弋陽漢屬汝南魏分汝  
南置弋陽郡晉因之弋陽縣屬弋陽郡故不言郡也



傳胥命于弭○陳傳良曰傳見桓三年齊衛特書

臣召

南按齊衛胥命于蒲之外惟此傳有胥命二字時號

鄭相約勤王此美事也先儒疑齊衛相推為侯伯不

亦誣乎

傳王巡號守○

臣浩

按是時雖異于方岳朝會之盛然

猶有其名也河陽以後無巡守矣

傳成子得政○朱子曰陳敬仲畢萬季友占筮皆其子

孫假託如後世符命之類

春秋左氏傳注疏卷八考證

謹按第十一頁前七行疏非止等差之謂也刊本

監本毛本止並訛正據宋本改


第二十一頁前八行壺短狐也諸本狐訛弧據宋  
本改

第二十二頁前一行疏四曰緹齊刊本緹訛醴據  
周禮及宋本改二行同

第三十頁前一行疏觀謂之闕刊本作謂觀之闕  
據爾雅及宋本改

第四十頁前三行疏更生他土而長育刊本土訛

上今改



覆校官編修臣張秉愚

校對官修撰臣張書勲

謄錄監生臣陳

增